

Naqqiut

Oqaaseqaatit 26. februar 2016-imeersut taarserneqarput
(kukkusumik paragrafinut innersuussinernik iluarsineq, oqaasertaliussat
kukkunillit aamma kukkuniuiniikkut iluarsissutit)

Inatsisissatut siunnersuummut nassuiaatit

Oqaaseqaatit nalinginnaasut

1. Aallaqqaasiut

1.1. Siunnersuummut pingaarnertigut tunuliaqutaasut

Timersornermut tunngasut annertuutigut nukittorsarnissaat Naalackersuisut anguniagaraat. Tassa imaappoq timersorneq timigissarnerlu. Naalackersuisut isumaqarput timersorneq timigissarnerlu pillugit immikkut inatsisiliorneq anguniagaq taanna tapersorsorniarlugu tunngaviussasoq pingaaruteqartoq.

Inatsisissatut siunnersuummi pingaarnertigut siunnerfigineqarpoq timersornermut tunngasut pisortat akisussaaffigisaattut erseqqinnerusumik inissisimalernissaat annertunerusumik pingaaruteqalernissaat, tassunga ilanngullugit pisortani oqartussat timersornermilu kattuffiit immikkoortumi akisussaaffii erseqqinnerulersillugit.

Naalackersuisut isumaqarput timersorneq timigissarnerlu inuiaqatigiit ineriartornerannut annertuumik pingaaruteqartut, tassunga ilanngullugit inuit ataasiakkaat peqqissusiat, ingerlalluarnerat, timikkut, tarnikkut inuuniarnikkullu ineriartornerat. Timersorneq timigissarnerlu taamaalillutik innuttaasut peqqissusiat, ingerlalluarnerat atugarissaarnerallu annertunerulersinnissaa anguniarlugu siunertaq pingaaruteqartuusooq.

Timersorneq timigissarnerlu aamma siunertarpassuarnut allanut pitsaasunut iluaqutaavoq, tassunga ilanngullugit katerisimaarnerup ataatsimoornerullu nuannersuuneri kiisalu inuit oqartussaaqataanerannik pilersitsisarluni.

Tamanna isigalugu Naalackersuisut isumaqarput timersornermi kattuffiit suleqatigalugit pisortani oqartussat akisussaaffigigaat inuiaqatigiinni immikkoortuni tamani timersornerup timigissarnerullu siuarsarnerata qulakkeerneqarnissaa, tassunga ilanngullugit atulersussani tunngaviusumillu atuarfimmi, ilinniarfeqarfinni, sunngiffimmi neqeroorutini, suliffeqarfinni aamma peqqinnissakkut isumaginninnermilu tunngasuni.

Peqatigisaanik Naalackersuisut isumaqarput pingaaruteqartoq timersornerup timigissarnerullu nunami tamarmi kikkunnut tamanut ammasuunera pisortat timersornermi kattuffiit

suleqatigalugit qulakkiissagaat, tassunga ilanngullugu inuit immikkut pisariaqartitsisut siunnerfigalugit suliniutit tapersornerisigut aamma peqataanissamut aningaasaqarnikkut aporfiit annikillisinniarlugit suliniuteqarnikkut.

Timersorneq timigissarnermullu tunngasut annertuutigut kajumissutsiminnik ingerlatalinnik tunngaveqarlunilu pinngitsuugaqarsinnaanngilaq. Naalackersuisut isumaqarput immikkoortumi kajumissuseqarnermut tunngasut aalajangiussimaneqarnissaat ineriartortinneqarnissaalu pingaaruteqartoq taamaattumillu isumaqarlutik aamma pisariaqartoq pisortat timersornermi kattuffiit suleqatigalugit timersornermi timigissarnermilu tunngasuni kajumissuseqarlutik suliaqartunut tapersersuisoqarnissaannut pitsaasunillu atukkanik pilersitsisoqarnissaanut kajumissaarissasut.

Timersornermut aamma ilaapput timersornerup ilaa unammilluni timersornermik taaneqartartoq. Unammilluni timersornikkut ingerlataqartut timersuutigisap ataatsip iluani piginnaasamikkut sungiusarnissaminnut periarfissaqartarput unamminerillu aqquqatigalugit allanut nallersuussinnaallutik. Unammilluni timersorneq inuunnaat timersornerisa iluanni aamma timersortartut pikkorivissut iluanni ingerlanneqartarpoq marluullutik tapersorneqartussaallutik. Naalackersuisut isumaqarput pingaartoq amerlasuut kiisalu pikkorivissut timersornerat tapersorneqarpata, tassunga ilanngullugu kalaallit timersortartut pikkorivissut nunani tamalaani timersornikkut aaqquissuussineranni qaffasinnerpaanik peqataasinnaanerat siunertaralugu.

Naalackersuisut isumaqarput pingaartuusooq timersorneq pillugu inatsisip timersornermik timigissarnermillu ingerlataqartumut pingaarnertigut toqqammavissanik qulakkeerinera tamatumunngalu pitsaasunik tunngavissiilluni. Peqatigisaanik Naalackersuisut isumaqarput pingaartoq timersornerup timigissarnerullu ernumananngitsumik isumannaatsumillu toqqammaveqarluni ingerlanneqarnissaannik tunngaveqarneri aamma timersorneq timigissarnerlu peqqusersuinnermik, ataqqinninnermik akaarinninnermilu tunngaveqassasoq.

Tamanna ilaatigut nakorsaait pissassaaitut atorineqartarnerinik aamma timersorluni unamminernik allanngortitsinernik, - aamma unamminernik siumoortumik isumaqatigiissuteqarnermik taaneqartunik - pitsaaliuineq akiuiniarnerlu pillugit maleruagassatigut pissaaq. Pissutsinik taakkuninnga pitsaaliuineq akiuinerlu pingaarpoq timersornermik timigissarnermillu ingerlataqarnerit tamat tunngavigisaannik pingaartitanik tunngaviusunik naammassinninnissaq eqqarsaatigalugu. Kisianni aamma tamanna Kalaallit Nunaata nunani tamalaani tamanna pillugu isumaqatigiissutinik naammassinnissaanut pisariaqarpoq, taamaalillunilu kalaallit timersortartuisa nunani tamalaani unamminernut peqataasinnaaneranunat aamma tunngaviulluni.

1.2. Inatsisip piareersarnerani pingaarnertut taasariaqartut

Kulturikkut sunngiffimmilu ingerlataqarneru pillugu peqqussummik nutarterisoqarnissaa Naalackersuisunit pisariaqartinneqarsimavoq. Tassunga atatillugu naleqquttutut

isigineqarsimavoq tunngaviusumik inatsisinik pingasunik piareersaanissaq. Eqqumiitsuliornermut tunngasunut tunngaviusumik inatsit, immikkut kulturi pillugu inatsit, tassani ilaatinneqarlutik kultureqarnermut tunngasut iluanni sunngiffimmi ingerlataqarnerit kiisalu immikkut timersorneq pillugu inatsit, tassani ilaatinneqarlutik timersornermut tunngasut iluanni sunngiffimmi ingerlataqarnerit. Tassani siunertarineqarpoq eqqumiitsuliornermut kultureqarnermullu ingerlataqarfiit tamarmik, tassunga ilanngullugu timersorneq, pisortat akisussaaffigisaattut pitsaanerusumik erseqqinnerusumillu inissinneqarnissaat.

Tunngaviusumik inatsisit nutaat eqqumiitsuliornermut aamma kulturikkut ingerlataqartut, kommunit kiisalu Naalakkersuisut akornanni akisussaaffiit agguarneqarneri erseqqissarlugillu paasiuminarnerulersissavaat. Inatsisip nutaap eqqumiitsuliornermik aamma kulturimik ingerlataqarnerit, tassunga ilanngullugu timersornermik ingerlataqarneq, assigiinngisitaartut periarfissanik qulakkeerutissavaat, innuttaasut kulturikkut, tassunga ilanngullugu timersorneq timigissarnerlu, ingerlataqarnissamut peqataanerannik siuarsaasussat.

Missingersuutit qaffasinnissaat aqqissugaanikkullu aqqiinerit tamatigut politikikkut nalilersuiffigineqarlutillu pingaarnersiorneqartassapput. Taamaattumik pisortat akisussaanerannut ataqatigiissillugu pingaarnertigut tunngaviusumik inatsisit nalunaarutinut, politikikkut nalilersuinernut pingaarnersiuinernullu ingerlaavartumik naleqqussarneqartunut naleqqiullugit immikkoortuni kinguneqarluartumik eqaatsumillu malittarisassaliornerussaaq.

"Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaata nr. 10-p, 21. maj 2002-meersup allannguutissaatut siunnersuummik kingusinnerpaamik UPA 2016-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut kulturimut immikkut inatsimmik aammalu timersornermut immikkut inatsimmik suliaqartoqarsinnaaqqullugu." Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap UPA 2015/32 aqqutigalugu allannguutissatut siunnersuutaanik Naalakkersuisut naammassinnissimanerisut isigineqartariaqarportaaq.

Inatsisissamik piareersaalluni sulinermi annertuutigut soqutigisaqaqatigiit ilanngunneqarnissaat Naalakkersuisunit pingaartinneqarsimavoq. Taamaalilluni ulloq 16. september 2015-imi aallarniutaasumik soqutigisaqaqatigiinnik ataatsimiisitsisoqarsimavoq, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq inatsiliornermi suliasaq tassanilu eqqarsaasersuutit pillugit ilisimatitsisimalluni, aamma soqutigisaqaqatigiit sulinermut siunnersuuteqarnissaannut periarfississimallugit. Tamanna isumasioqatigiinnermik malitseqartinneqarpoq ulluni 8.- 9. oktober 2015-imi ingerlanneqartoq, kommuninut KANUKOKA-mut, Kalaallit Nunaannit Timersoqatigiit Kattuffiannit, Elite Sport Greenlandimit aamma Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmit sinniisut peqataaffigisaat.

Kingornatigut siunnersuut pillugu Kalaallit Nunaanni Timersoqatigiit Kattuffiat oqaloqatigeqqinneqarsimavoq.

Inatsisissamik piareersaalluni sulinermi aamma Kalaallit Nunaannit Timersoqatigiit Kattuffiata suliniuteqarneratigut Idrættens Analyseinstitutti november 2015-imi nalunaarusiami saqqummersinneqartumi ”Kalaallit Nunaanni timersorneq, killiffik, unamminartut ineriartornissamullu periarfissat”-ni inernerit kaammattuutillu pingaartinneqarsimapput. Tassunga atatillugu tulliuttumi nalunaarusiamut innersuussisoqartassaaq taaguuserlugu ”Timersorneq pillugu killiffik pillugu nalunaarusiaq”.

1.3. Siunnersuutip imaata nalinginnaasutigit ilisarnaataa

Inatsisissatut siunnersuut immikkoortunik pingaarnernik marlunnik isigisaqarpoq. Siullermik timersornerup tapersorneqarnera, tassunga ilanngullugit unammilluni timersorneq aamma timigissarneq. Aappaatut nakorsaait pissassaaitut atornerqartarnerinik aamma unamminernik siumoortumik isumaqatigiissuteqarnernik pitsaaliuineq akiuinerlu.

Inatsisip atuuffia siunnersuummi kapitali 1-imi killilerneqarpoq. Tamanna ilaatigut pivoq inatsisartut inatsisaata sumut atornerqarnera pillugu § 1-imi aalajangerneqarneratigut ilaatigullu taaguutit pingaarutillit nassuiarneri pillugit § 2-mi aalajangerneqarneratigut.

Siunnersuummi kapitali 2-mi timersornerup timigissarnerullu ernumananngitsuunissaa, isumannaatsuunissaa minguitsuunissaalu qulakkeernissaanik siunertaqartunik maleruagassanik aalajangersaasoqarpoq. Tamanna pivoq §§ 3-5-imi timersornermi kattuffiit, timersoqatigiiffiit aamma timersortartut klubbiisa kiisalu timigissartarfiit allallu ingerlataqarfiit timersornermik imaluunniit timigissarnermik sammisaqarnissamik neqerooruteqartut imaluunniit taakkununga eqqaanartunik sammisaqartitsisut pillugit tassunga attuumasunik pisussaaffinnik aalajangersaasoqarneratigut. Kiisalu siunnersuummi § 6-mi timersorluni unamminermut atatillugu akiliilluni peqquserlutsitsineq qanoq paasineqassanersoq tassungalu pineqaatissiinissamut tunngavik pillugu maleruagassanik aalajangersaasoqarpoq.

Siunnersuummi kapitali 3-mi pisortani oqartussat akisussaaffiisa suliassaasalu agguarneqarneri aalajangersarneqarput. Pisortani oqartussat tassaapput Naalakkersuisut aamma kommunalbestyrelsit. Taakku timersornermi kattuffiit suleqatigalugit inuiaqatigiinni immikkoortuni tamani timersornerup timigissarnerullu tapersorneqarnera qulakkiissavaat, aamma timersorneq timigissarnerlu nunami tamarmi kikkunnit tamanit ingerlanneqarsinnaanera qulakkiissavaat. Oqartussat timersornermi kattuffiit suleqatigalugit timersornermut timigissarnermullu tunngasuni kajumissuseqarluni suliaqarnermut kajumissaaralutillu toqqammavinnut pitsaasunik pilersitsillutillu tapersersuissapput. Aalajangersakkani taakkunani siunniunneqarpoq ataatsimoortumik oqartussatut akisussaaneq pineqartoq, timersornermi kattuffiit peqatigalugit tamanna pillugu suleqatigiinnikkut taamaallaat piviusunnigortinneqarsinnaasoq.

Tamatuma nanginneratut Naalakkersuisut kommunalbestyrelsillu akisussaaffiinik, piginnaatitaaffiinik suliassaanillu erseqqissaasunik maleruagassanik aalajangersaasoqarpoq. Taakkununga ilaapput Naalakkersuisut eqqarsaatigalugit siullermik immikkoortumi neqeroorutit pissarsiarinissaannut taakkulu ingerlanneqarsinnaaneritut aamma timersornerup timigissarnerullu ernumananngitsuunera isumannaatsuuneralu pillugit maleruagassat aamma timersornerup timigissarnerullu minguitsuunera pillugu maleruagassat eqqortinneqarnissaannut akisussaanerat. Tulliatut Kalaallit Nunaanni Timersoqatigiit Kattuffiannut aamma Elite Sport Greenlandimut aningaasanut inatsimmi taakkununga aningaasaliisoqarneratigut timersornermut tapersersuinissamut Naalakkersuisut pisussaaffeqarnerat aalajangersarneqarpoq. Tamatuma nanginneratut piumasarineqarpoq taakku nakorsaaitit pissassaaitit atorneqartarnerisa pitsaaliornissaat akiuinerlu pillugu Nakorsaaitit Pissassaaitit Atorneqartarnerinut Kalaallit Nunaanni Akiuisut maleruagassanik aalajangersagaanik malitsissasut eqqortissasullu pillugit maleruagassanik aalajangersaasoqarpoq, aamma tapiissuteqarnissamut aamma piumasarineqarsinnaasoq kattuffiit taaneqartut aamma timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut atortussasullu. Kiisalu Naalakkersuisunut tunngatillugu timersortarfinnik sanaartornermut, iluarsaassinermut aqqissuussinermullu Naalakkersuisut tapiissuteqarsinnaanerat pillugu maleruagassanik Naalakkersuisut aalajangersaasinnaapput. Tassunga atatillugu erseqqissarneqarpoq timersortarfinnut aqqissuussinernullu tapiissutit annerusumik nuna tamakkerlugu nunallu immikkoortuini timersortarfinnut tutsinneqartassasut.

Aammattaaq kommunalbestyrelsit akisussaaffii pillugit maleruagassanik aalajangersaasoqarpoq. Tassani siullermik ilaapput timersornermut timigissarnermullu assigiinngitsunik neqerooruteqarnermut kommunalbestyrelsi akisussaavoq tamatumunngalu anguniakkanik tunngavinnillu aalajangersaalluni. Tulliatut kommunip illoqarfiini nunaqarfiinilu timersornikkut timigissarnikkullu neqerooruteqarnissamut kommunalbestyrelsit ukiut tamaasa pilersarusiornissamut taassumalu kommunip nittartagaatigut tamanut saqqummiunneqarnissaanut pisussaaffeqarput. Kiisalu kommunalbestyrelsip sumiiffimmi timersornikkut timigissarnikkullu ingerlatanut tapiissuteqarsinnaanera, timersortarfiit sanaartornerinut, iluarsaannerinut aqqissuunnerinullu tapiissuteqarsinnaanera aamma ininut silamilu timersorfinnut, timersornermi klubbinit pigineqartunut attartorneqartunulluunniit ingerlatsinermi aningaasartuutinut tapiissuteqarsinnaanera pillugu maleruagassanik aalajangersaasoqarluni. Erseqqissarneqarpoq timersortarfinnut sanaartornermut, iluarsaannerinut aqqissuunnerinullu tapiissutit sumiiffinni timersortarfinnut tapiissutaanerusartut.

Siunnersuummi kapitali 4-mmi timersornermi kattuffiit pillugit maleruagassanik aalajangersaasoqarpoq. Tassaniipput Kalaallit Nunaanni Timersoqatigiit Kattuffiat, Elite Sport Greenland, inatsisikkut pilersinneqartoq ataatsimiititaliaq attaviitsoq Nakorsaaitit Pissassaaitit Atorneqartarnerinut Kalaallit Nunaanni Akiuisut aamma inatsisikkut

pilersinneqartoq naammagittaalliorfik Kalaallit Nunaanni Nakorsaait Pissasaatit Atorneqartarnerinut Akiuiniarnermut Ataatsimiititaliaq. Taakku saniatigut nakorsaait pissasaatit atorneqartarnerinik pitsaaliuineq akiuinerlu pillugit timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik sammisaqartitsisut aamma Kalaallit Nunaanni Timersoqatigiit Kattuffianut ilaanngitsut aamma Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avataanni timersornermi timigissarnermilu ingerlataqartut kattuffiinut Nakorsaait Pissasaatit Atorneqarnerinut Kalaallit Nunaanni Akiuisunik suleqatigiinnissamik isumaqatigiissuteqarnissaat pillugu maleruagassaqqarpoq. Maleruagassanut taakkununga aamma ilaavoq nalunaaqutsiinissamik aqqissuussineq, taanna naapertorlugu timigissartarfiit il.il. taamatut suleqatigiinnissamut isumaqatigiissuteqarsimanerlutik pillugu paasissutissinissamut pisussaaffilerneqarnerat.

Siunnersuummi kapitali 5-imi aningaasalersuineq allaffissornerlu pillugit maleruagassanik aalajangersaasoqarpoq, tassani aalajangersarneqarluni timersornermut timigissarnermullu aningaasartuutit tamarmik kommunimit akilerneqassapput, aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat.

Siunnersuummi kapitali 6-imi naatsorsuutit kukkunersiunerlu pillugit maleruagassanik aalajangersaasoqarpoq, tassunga ilanngullugit Kalaallit Nunaanni Timersoqatigiit Kattuffiat, Elite Sport Greenland aamma Nakorsaait Pissasaatit Atorneqartarnerinut Kalaallit Nunaanni Akiuisut kiisalu tapiissutisartut allat pillugit immikkut maleruagassat.

Siunnersuummi kapitali 7-imi naammagittaalliuuteqarneq pillugu maleruagassanik aalajangersaasoqarpoq, aalajangerneqarluni Naalakkersuisut kiisalu kommunalbestyrelsit aalajangiineri allaffissornikkut oqartussanut allanut suliaassanngortinneqarsinnaanngitsut.

Siunnersuummi kapitali 8-mi misileraalluni aqqissuussinissamut periarfissat pillugit maleruagassanik aalajangersaasoqarpoq, tassunga ilanngullugu taakkununga tapiissuteqarsinnaanermut periarfissat pillugit.

Siunnersuummi kapitali 9-mi nakkutilliineq pineqaatissiinerlu pillugit maleruagassanik aalajangersaasoqarpoq, tassunga ilanngullugit inatsimmi maleruagassanik erseqqinnerusumik taagorneqartunik unioqquutitsinernut akiliisitsinissamut periarfissat pillugit aamma pissuseq immikkut ingasattoq, arlallit peqatigiinnerisigut, imaluunniit pineqartup tunissutip imaluunniit iluaqusiinerup annertussusiata malitsigisaanik ingerlanneqarsimappat akiliilluni peqquserlutsitinernut sukanganerusumik pineqaatissiinissamut periarfissaqqarneq.

2. Inatsisissatut siunnersuummi immikkoortut pingaarnerit

a) Inatsisit atuuttut

Timersornermut tunngasoq manna tikillugu annerusumik kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaat nr. 10, 21. maj 2002-meersukkut (kulturimut sunngiffimmullu peqqussut) malittarisassaqaqtinneqarpoq, tassani timersorneq kapitali 6-mi aammattaaq init silamilu ingerlatsiviit pillugit kapital 9-mi malittarisassaqaqtinneqarluni allatigullu peqqussummi maleruagassanut nalinginnaasunut ilaatinneqarluni.

Peqqussummi §§ 2 aamma 3-mi aqutsineq pillugu maleruagassanik aalajangersaasoqarsimavoq, tassunga ilanngullugu akisussaaffiit agguarneqarneri. Taamaalilluni § 2, imm. 1-mi aalajangersarneqarpoq kommunalbestyrelse kommunimi kulturikkut ingerlatsinermit sunngiffimmilu sammisassaqaqtitsinermit qullersaalluni akisussaavoq innuttaasullu innuttaaqatigiikkuaalluunniit kulturikkut sunngiffimmilu sammisassatigut tamakkiisumik neqeroorfiginissaat anguniarlugu anguniagassat tunngavissallu aalajangersassallugit. Imm. 2-mi aalajangersarneqarpoq ukiut tamaasa illoqarfimmi nunaqarfimmiluunniit kulturikkut ingerlatsinissamut sunngiffimmilu sammisassaqaqtitsinissamut kommunalbestyrelsi pilersaarusiortassaaq. Imm. 3-mi aalajangersarneqarpoq kommunalbestyrelsip atorfinitsissavai sulisussat kommunimi kulturikkut sunngiffimmilu sammisassaqaqtitsinikkut sulinermi ulluinnarni ingerlatsisussat pisariaqartut.

§ 3, imm. 1-imi aalajangersarneqarpoq sumiiffinni kommunit aggornerisa avataanniittuni peqqussut manna malillugu kommunalbestyrelsimut ulluinnarni suliassarititaasut Naalackersuisunit isumagineqassapput. Imm. 2-mi aalajangersarneqarpoq imm. 1 malillugu Naalackersuisunit isumagisassanngortitaasut kommunit ataatsimut arlalinnuunniit kommunalbestyrelsi isumaqatigalugu Naalackersuisut sularisassanngortissinnaavaat.

Aqutsinermit maleruagassat nakkutilliineq aamma aningaasalersuineq pillugu aalajangersakkanik ilassuteqarput. Taamaalilluni § 37-mi aalajangersarneqarpoq aningaasartuutit kulturikkut ingerlatsinermit inunnillu qaammarsaanermit atorneqartut kommunit tamakkerlugit akiligassaraat, aningaasartuutit tamakkerlugit ilaannaaluunniit Namminersornerullutik Oqartussanit (maannakkut Namminersorlutik Oqartussat, aaqq.) allanilluunniit akilerneqassasut inatsisitigut erseqqissumik tunngavissiiisoqarsimanngippat. Namminersornerullutik Oqartussat kommunillu suliassat peqqussummi suliassiissutaasut sularinissaannut akiliuteqarlutik isumaqatigiissuteqarsinnaapput. Imm. 2-mi aalajangersarneqarpoq sumiiffinni kommunit aggornerisa avataanniittuni aningaasartuutit Naalackersuisunit akilerneqassapput.

§ 40-mi aalajangersarneqarpoq peqqussut manna naapertorlugu kommunalbestyrelsit aalajangigaat pisortanut oqartussaasunut allanut suliassanngortinneqarsinnaanngitsut aammalu sulianut Naalackersuisut isumaqatigineratigut kommunalbestyrelsimut tunniunneqartunut tunngatillugu kommunalbestyrelsip aalajangigai aalajangiinnermiit sapaatit akunneri sisamat qaangiutsinnagit Naalackersuisunit suliassanngortinneqarsinnaasut.

§ 36-mi aalajangersarneqarpoq Naalakkersuisut peqqussut malillugu isumagisassaminut paasissutissat pisariaqarsorisatik kommunalbestyrelsimit piumasinnaavaat.

§ 39-mi aalajangersarneqarpoq Naalakkersuisut pissutsini immikkut ittuni aaqqissuussigallarnertut peqqussummi aalajangersakkat saneqqussinnaavaat peqqussutip iluani misileraaneq siuarsarumallugu tamanna pisariaqartutut isigineqarpat, aamma imm. 2 naapertorlugu Naalakkersuisut misileraanernut tapiissuteqarsinnaapput.

Peqqussummi kapitali 6-imi timersorneq pillugu maleruagassanik aalajangersaasoqarpoq.

§ 24-mi aalajangersarneqarpoq Naalakkersuisut timersoqatigiit nuna tamakkerlugu kattuffiinut tapiissuteqarsinnaapput ataatsimoortumik aningaasaliissuteqarnikkut.

§ 25-mi aalajangersarneqarpoq Naalakkersuisut piukkunnartunut timersullammannullu kiisalu nunat tamalaat akornanni timersornikkut peqataanernut tapiissuteqarsinnaapput Team Grønlandimut ataatsimoortumik aningaasaliissuteqarnikkut.

§ 26-mi aalajangersarneqarpoq kommunalbestyrelse najukkani timersoqatigiit peqatigiiffiinut tapiissuteqarsinnaavoq, tamatumani ilanngullugu ilitersuisut/sungiusaasut akissarsiaqartitaanerannut.

§ 27-mi aalajangersarneqarpoq meeqqat inuusuttullu suliniaqatigiiffiinut sanilliullugu killiliinissaq pillugit Naalakkersuisut malittarisassiussasut.

Peqqussummi kapitali 9-mi init silamilu ingerlatsiviit pillugit maleruagassanik aalajangersaasoqarpoq.

§ 33, imm. 2-mi aalajangersarneqarpoq kommunalbestyrelse ininut silamilu ingerlatsivinnut timersoqatigiiffinnit pigineqartunut attartorneqartunulluunniit ingerlatsinermut tapiissuteqarsinnaavoq.

§ 34, imm. 2-mi aalajangersarneqarpoq Naalakkersuisut timersortarfiit sananerannut, iluarsarnerinut aaqqissuunneranullu tapiissuteqarsinnaapput.

Kiisalu tapiissutit pillugit peqqussummi § 35-mi aalajangersarneqarluni kommunalbestyrelse allalluunniit init timersortarfiilluunniit pilersitaanerannut iluarsarneqarneranullu tapiissuteqarsimappata Naalakkersuisut tapiissutit ilaat utertillugit akilersinnaavaat.

§ 38-mi peqqussut manna malillugu tapiissutinut qanorlu allaffissornikkut aqunneqarnissaannut malittarisassiorsinnaanerannut Naalakkersuisut tunngavissinneqarput. Tunngavik atorneqarsimangilaq.

Kulturimut sunngiffimmullu peqqussummi malittarisassaliat saniatigut Nakorsaaitit pissassaaitut atorneqartartut ilaasa inerteqqutaanerat pillugu Inatsisartut peqqussutaat nr. 7, 31. maj 2001-imeersukkut pissassaatinut tunngasunik maleruagassanik

aalajangersaasoqarpoq. Peqqussummi § 1-mi nakorsaatit pissassaatit atorneqartartut suunersut aalajangersarneqarpoq aamma § 2-mi nakorsaatit pissassaatit atorneqartartut nakorsaatinut sorlernut allanut peqqussutip matuma atuunnissaanut Naalakkersuisit aalajangersagaliornissaminut piginnaatinneqarput. Piginnaatitsineq taanna atorneqarsimangilaq.

Peqqussummi § 3-mi aalajangersarneqarpoq § 1-imi aamma § 2-mi nakorsaatit pissassaatit atorneqartartut nakorsaatit pineqartut nakorsaasiarineqassanngillat, eqqunneqassanngillat, anninneqassanngillat, tuniniarneqassanngillat, tunniunneqassanngillat agguanneqassanngillat pigineqaratilluunniit nappaammik pinaveersaartitsinermut katsorsaanermulluunniit atorneqarneri eqqaassanngikkaanni imaluunniit ilisimatusarnermik siunertaqarneq eqqaassanngikkaanni. Peqqussummi § 4-mi § 3, 1-imi unioqqutitsisoq akiliisitaasussanngorlugu arsaarinniffigisassanngorlugu eqqartuunneqarsinnaasoq aalajangersarneqarpoq.

Nakorsaatit pissassaatit atorneqartartut ilaannut inerteqqussut pillugu peqqussutip taaneqartup saniatigut tassunga atatillugu aamma eqqaaneqassaaq ikiaroorartut pillugit inatsit Kalaallit Nunaannut atuuttoq aamma eqqaaneqassaaq, tassa ikiaroorartut pillugit inatsit inatsisitigut nalunaarut nr. 391, 21. juli 1969¹-imeersoq, inatsisikkut nr. 296, 9. juni 1971²-imeersutigut allanngortinneqartoq kiisalu inatsit nr. 160, 28. April 1982-imeersutigut allanngortinneqartoq aqqutigalugu Kalaallit Nunaannut atulersinneqartoq, kingulleq pineqartoq Kunngip Kalaallit Nunaannut peqqussutaatigut nr. 580, 30. August 1989³-imeersoq aqqutigalugu peqqussutaavoq. Aammattaaq ikiaroorartut pillugit nalunaarut nr. 559, 9. november 1984⁴-imeersukkut maleruagassanik aalajangersaasoqarsimavoq. Nalunaarut nr. 53, 13. februar 1986⁵-imeersoq, Nalunaarut nr. 18, 5. januar 1989⁶-imeersoq aamma Nalunaarut nr. 567, 21. august 1989⁷-imeersoq aqqutigalugit nalunaarut allanngortinneqarsimavoq. Ikiaroorartut pillugit inatsimmi allassimavoq ikiaroorartunik tuniniaaneq, pisineq, eqqussineq annissinerlu, tigusaqartarneq tunisassiorneq, pigisaqarneq sanasarnerlu inerteqqutaasut. Inatsit tunngavigalugu ikiaroorartut inatsit naapertorlugu inerteqqutaasut allatorneqarsimapput, nunat tamalaat akornanni aalajangersakkat naapertorlugit imaluunniit peqqinnissakkut oqartussaasut naliliinerat naapertorlugu ikiaroorutaasinnaanertik pissutigalugu navianartorsiortitsisinnaammata.

Pinerluttulerineq pillugu inatsimmi peqquserluttuliorneq pillugu (§ 104), iluanaarutissatut utertissutinik tigusaqarneq pillugu (§ 116), akiliilluni peqquserlutsitsiniarneq (§ 38),

¹ Nalunaerutit 1969, side 160

² Nalunaerutit 1971, side 100

³ Nalunaerutit 1989, side 132

⁴ Nalunaerutit 1985, side 3

⁵ Nalunaerutit 1986, side 44

⁶ Lovtidende A 1989, side 93

⁷ Lovtidende A 1989, side 1982

akiliutinik peqquserlutsitsiniutinik tigusaqarsimasutut (§ 48), eqqartuussisumut isumaqatigiisitsiniaasartumut akiliilluni peqquserlutsitsinermut (§ 117, imm. 1) aamma eqqartuussisutut isumaqatigiisitsiniaasartutut atorfeqarnerminut atatillugu tunissummik imaluunniit allamik ajunngitsorsiassamik pisinnaatitaanani tigusaqartoq (§ 117, imm. 2) pillugu maleruagassanik aalajangersaasoqarpoq. Taamaattorli maleruagassat taakku arlaat toqqaannartumik timersornermut attuumassuteqanngillat, tassunga ilanngullugu nakorsaatit pissassaatit atorneqartut aamma timersorluni unamminernik allanngortiterineq. Tassunga atatillugu oqaatigineqassaaq akiliilluni peqquserlutsitsiniarneq pillugu aalajangersakkat taamaallaat inunnut pisortani atorfeqartunut imaluunniit sulisunut atorneqarmata. Taamaaqataanik eqqartuussisumut isumaqatigiisitsiniaasartumut akiliilluni peqquserlutsitsineq pillugu aalajangersakkat timersornermi dommerinut atorneqarnatik.

Aningaasanoorutit ilaannit iluanaarutinit agguaassisarneq pillugu Inatsisartut Inatsisaatnr. 10, 22. november 2011-meersumi § 1, imm. 1-imi aalajangersarneqarpoq aningaasanoorutit ilaat pillugit Kalaallit Nunaannut inatsit naapertorlugu pissarsiassat ukiumoortumik Kalaallit Nunaannut pisassanngortinneqartartut Naalakkersuisut tamanut iluaqutaasussamik siunertanut makkununga agguaatissavaat:

- 1) 50 %-ii timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1 %-ii piukkunnaatillit pikkorinnerillu timersornerinut,
- 3) 13,6 %-ii meeqqat inuusuttullu peqatigiiffiinut, aamma
- 4) 27,3 %-ii tamanut iluaqutaasussamik siunertanut allanut, taamatuttaaq kulturimut tunngatillugu siunertanut, inunnik qaammarsaanermut siunertanut, nappaatinik akiuiniarnermut pinaveersaartitsinermullu siunertanut, inooqatigiinnermut tunngasunut siunertanut, asimiititsinissanik siunertanut aamma tamanut iluaqutaasussanik ilisimatusarniarluni siunertanut.

Inatsimmi § 2, imm. 1-mi aalajangersarneqarpoq atugassanngortitat § 1, imm. 1-imi taaneqartut imatut agguaanneqassapput:

- 1) atugassanngortitat § 1, imm. 1, nr. 1-imi taaneqartut Kalaallit Nunaanni Timersoqatigiit Kattuffiannut, timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguaasseqqinnermik isumaginnittussamut agguaanneqassapput,
- 2) atugassanngortitat § 1, imm. 1, nr. 2-mi taaneqartut Elite Sport Greenlandimut, piukkunnaatillit pikkorinnerillu timersornerinut agguaasseqqinnermik isumaginnittussamut agguaanneqassapput.

2016-imut aningaasanut inatsimmi timersornermut aningaasanik immikkoortitsisoqarsimavoq, timersornermut toqqaannartumik aningaasaliissutit imaluunniit timersornermut siunnerfeqartumik aningaasaliissutit ilaatut. Aningaasaliissutit taakku kontoni pingaarnerni ukunani aningaasaliissutaapput:

40.94.13 Timersornermut tapiissutit (Tapiissutit aningaasaliissutit).

40.94.20 Arctic Winter Games aamma Island Games (Ingerlatsinermut aningaasaliissutit).

40.94.21 Danske Spil A/S-p tipsernermit lottonermillu kaaviiartitaanit Kalaallit Nunaata pissarsiaanit tapiissutit (Tapiissutitut aningaasaliissutit).

40.94.22 Danske Spil A/Simi kaaviiartitanit Kalaallit Nunaata pissarsiassai (Isertitatut aningaasaliissutit).

Nunap iluani maleruagassat taaneqartut saniatigut nakorsaatit pissassaatit atorneqartut akiorneqarneri pillugit aamma timersorluni unamminernik allangortiterinerit akiornissaat pillugu nunani tamalaani isumaqatigiissuteqarpoq. Pingaarnertut taakkununga ilaapput:

- Timersornermi nakorsaatit pissassaatit atorneqartarnerinut UNESCOp isumaqatigiissutaa, ulloq 19. oktober 2005 UNESCO-mit akuerineqarsimasoq.
- Europarådip nakorsaatit pissassaatit atorneqartarnerinut akiuiniarneq pillugu isumaqatigiissutaa CETS nr. 135, ulloq 16. november 1989 Europarådimit akuerineqarsimasoq.
- Timersorluni unamminernik allangortiterinerit pilugit Europarådip siumaqatigiissutaa CETS nr. 215 18. september 2004-meersoq.

Taakku saniatigut World Anti-Doping Agency-mi (WADA) nakorsaatit pissassaatit atorneqartarneri pillugit nunani tamalaani maleruagassaqarpoq, nunarsuaq tamakkerlugu timersortartunut pikkorivissunut atuuttoq. Maleruagassat taakku taaneqartarput World Anti-Doping Program (WADP) imaralugillu ataatsimut isigalugit maleruagassat najoqqutassallu tamarmik, nunani tamalaani nunani ataasiakkaani nakorsaatit pissassaatit atorneqartartut akiorniarlugit suliniutinik naleqqusaanissamik qulakkeerisut. WADP-imi pingaarnersaasut tassaapput nakorsaatit pissassaatit atorneqartarnerinik akiuiniarnermut nunani tamalaani inatsisit ataatsimoortut (World Anti-Doping Code) aamma nunani tamalaani malittarisassat tallimat. World Anti-Doping Code tassaavoq pingaarnertigut maleruagassat, peqataasut atsiorsimasut tamarmik malissallugit pisussaaffigisaat. Nunani tamalaani malittarisassani allaaserineqarpoq nakorsaatit pissassaatit atorneqartarnerinik akiuilluni sulinermi periutsit assigiinngitsut qanoq ingerlanneqassanersut. Tassaniipput nakorsaatit pissassaatit atorneqartartut allattorsimaffiat, misiligutissanik tigusineq, misissueqqissaarneq, nakorsaatit pissassaatit atorneqartartut allattorsimaffiannit immikkut akuersineq aamma inuit pillugit nalunaarsukkanik illersuineq.

Isumaqatigiissutit taaneqartut Danmarkimit atortussangortinneqarsimapput, kisiannili Kalaallit Nunaannit akuerineqarsimanatik.

Aammattaaq ilisimatitsissutigineqarsinnaavoq Meeqqat Pisinnaatitaaffii pillugit NP- isumaqatigiissutaa 20. November 1989-imeersoq Kalaallit Nunaannit akuersaarneqarsimammat. Isumaqatigiissummi immikkoortoq 33-mi aalajangersarneqarpoq naalagaaffit peqataasut qanoq iliornissamut periusissanik naleqquttunik tamanik aalajangiissasut, tassunga ilanngullugit meeqqat ikiaroorartunik aannajaarniutinillu akuerisaanngitsumik atuinissaannut illersorniarlugit inatsisitigut, allaffissornikkut, inuuniarnermi ilinniartitaanermilu qanoq iliornissamut piareersaallutik soorlu nunani

tamalaani isumaqatigiissutini pineqartuni nassuarneqartoq, aamma ikiaroorartunik taamatut ittunik akuerisaanngitsumik tunisassiarinissaannut niuerutiginiissaannullu meeqqanit atorneqarnissaat pitsaaliorniarlugu.

b) Siunnersuut

Siunnersuummi pineqarpoq pingaarnertigut timersorneq timigissarnerlu aamma pisortani oqartussat kiisalu timersornermi kattuffiit taakkununga naleqqiullugu akisussaaffiisa suliassaasalu agguarneri.

Siunnersuummi aamma pineqarpoq ernumananngitsumik, isumannaatsumik minguitsumillu timersorneq timigissarnerlu pillugit maleruagassat, timersornermi kattuffiit pillugit maleruagassat, tassunga ilanngullugit timersornermi aaqqissuussinernik nutaanik pilersitsineq pillugu aalajangersakkat, tassa Nakorsaait Pissassaaitut Atorneqarnerinut Kalaallit Nunaanni Akiuisut aamma Kalaallit Nunaanni nakorsaait pissassaaitut atorneqartarnerinut ataatsimiititaliaq. Taakku saniatigut aningaasalersuineq allaffissornerlu, naatsorsuutit kukkunersuinerlu, naammagittaalliorneq, misileraanermi aaqqissuussinerit, nakkutilliineq pineqaatissiinerillu pillugit maleruagassat aamma atuutilersinneranut aalajangersakkat.

Kulturikkut ingerlatsineq sunngiffimmilu sammisassaqtitsineq pillugit peqqussummi maleruagassanut atuuttunut naleqqiullugu malunnartumik annertunerusumik malittarisassaliorneq pineqarpoq. Taamaalilluni nutaatut:

- timersorneq timigissarnerlu pillugit aalajangersakkanik aalajangersaasoqarpoq,
- timersornerup timigissarnerullu siuarsarnerani suup siunertaanerani aalajangersaaneq,
- taaguutit pingaarutillit nassuiaataannik aalajangersaaneq,
- timersornermi kattuffiit, timersoqatigiiffiit aamma timersortartut klubbiisa kiisalu timigissartarfiit timersornerup timigissarnerullu ernumananngitsumik isumannaatsumillu toqqammaveqarluni ikiaroorartumillu atuinertaqanngitsumik ingerlanneqarnissaat isumagisassaraat,
- timersornermi kattuffiit, timersoqatigiiffiit aamma timersortartut klubbiisa kiisalu timigissartarfiit allallu ingerlataqarfiit timersornermik imaluunniit timigissarnermik sammisaqarnissamik neqerooruteqartartut imaluunniit taakkununga eqqaanartunik sammisaqartitsisut timersornerup timigissarnerullu atortussiat inerteqqutaasut atornagit aamma periutsit inerteqqutaasut atornagit ingerlannissaa aamma nakorsaatinik pissassaaitut atorneqartartunik atuinnginnissaq pillugu maleruagassat Nakorsaait Pissassaaitut Atorneqartarnerinut Kalaallit Nunaanni Akiuisunit aalajangersarneqartut malinneqarnissaat atortinneqarnissaallu isumagisassaraat,
- timersornermi kattuffiit, timersoqatigiiffiit aamma timersortartut klubbiisa timersortut aamma timersortunut ikorfartuisut timersorluni unamminernik allanngortiteriniarnerni peqataannginnissaasa isumaginissaanut pisussaaffilerneqarput,

- timersorluni unamminermut atatillugu akiliilluni peqquserlutsitsineq qanoq paasineqarnissaa pillugu maleruagassanik aalajangersaaneq aamma taamatut akiliilluni peqquserlutsitsinermi pineqaatissiinissamut tunngavissiisoqarluni,
- timersornerup timigissarnerullu nuna tamakkerlugu siuarsarneri pillugit pisortani oqartussat timersornermi kattuffiit suleqatigalugit qulakkeerneqarnissaat,
- timersornermi kattuffiit suleqatigalugit inuiaqatigiinni immikkoortuni tamani timersornerup timigissarnerullu tapersorsorneqarnerat pisortani oqartussat qulakkiissagaat, tassunga ilanngullugu meeqqat inuusuttullu, utoqqaat, inuit pisinnaanermikkut ajoquteqartut aamma immikkut atugarliortut isiginiarneqarnissaat pingaartinneqarnissaat,
- timersornermi kattuffiit suleqatigalugit timersornermut timigissarnermullu tunngasuni kajumissuseqarluni suliaqarnermut kajumissaaralutillu toqqammavinnut pitsaasunik pilersitsillutillu tapersersuissasut pisortani oqartussat pisussaaffilerneqarlutik,
- Kalaallit Nunaanni Timersoqatigiit Kattuffiannut aamma Elite Sport Greenlandimut tapiissutit pillugit maleruagassat aalajangersarneri, tassunga ilanngullugit tapiissutit sumut atorneqassanersut, tapiissutit ilai aalajangersimasunut atorneqassasut, piumasaqaatit aamma ukiunut sisamanut angusaqarnissamik isumaqatigiissutit,
- Kalaallit Nunaanni Timersoqatigiit Kattuffiannut aamma Elite Sport Greenlandimut Naalackersuisut tapiissuteqarneranni piumasarineqarpoq taakku nakorsaaitit pissassaaitit atorneqartartut pitsaaliornissaat akiuinerlu pillugu Nakorsaaitit Pissassaaitit Atorneqarnerinut Kalaallit Nunaanni Akiuisut maleruagassanik aalajangersagaanik malitsissasut eqqortitsissasullu pillugu maleruagassanik aalajangersaaneq,
- Kalaallit Nunaanni Timersoqatigiit Kattuffiannut aamma Elite Sport Greenlandimut Naalackersuisut tapiissuteqarneranni piumasarineqarpoq timersorluni unamminernik allanngortiteriniarnerup pitsaaliornissaa akiuiniarnerlu pillugit Naalackersuisut maleruagassiaannik malinnissasut atuissasullu pillugu maleruagassanik aalajangersaaneq,
- Naalackersuisut timersortarfinnut aaqquissuussinernullu tapiissutaat annerusumik nuna tamakkerlugu nunallu immikkoortuini timersortarfinnut tapiissutaanissaannut erseqqissaaneq,
- kommunalbestyrelsip timersornermut timigissarnermullu tapiissuteqartarnera pillugu maleruagassat annertusineqarneri,
- Kalaallit Nunaanni Timersoqatigiit Kattuffiat aamma Elite Sport Greenland pillugit maleruagassanik aalajangersaaneq,
- timersornermi timigissarnermilu nakorsaaitit pisassaaitit atorneqartarnerinut suliniutit siunnerfeqarnerannik, pitsaaningortinnissaannik ataqatigiissarneqarnissaanillu siunertaqartumik ataatsimiititaliamik attaviitsumik, Nakorsaaitit Pissassaaitit Atorneqarnerinut Kalaallit Nunaanni Akiuisunik, pilersitsinissaq pillugu maleruagassanik aalajangersaaneq, tassunga ilanngullugit pitsaaliuineq akiuinerlu,

- Nakorsaatit Pissassaatit Atorneqartarnerinut Kalaallit Nunaanni Akiuisut suliassai, katitigaanera sulineralu pillugit maleruagassanik aalajangersaaneq,
- nakorsaatit pissassaatit atorneqarnerisa pitsaaliorneqarnissaat akiornissaallu pillugu timigissarfinnik il.il. piginnittunik Nakorsaatit Pissassaatit Atorneqartarnerinut Kalaallit Nunaanni Akiuisut suleqatigiinnissamut isumaqatigiissusiornissaa pillugu maleruagassanik aalajangersaaneq,
- timigissarfinnik il.il. nalunaaqutsersuineramik aaqqissuussineq pillugu maleruagassanik aalajangersaaneq,
- Nakorsaatit Pissassaatit Atorneqartarnerinut Kalaallit Nunaanni Akiuisut nakorsaatit pissassaatit atorneqartarnerinik nalunaarsuiffimmik ingerlatsinera pillugu maleruagassanik aalajangersaaneq,
- Nakorsaatit pissassaatit atorneqartarnerinik akiuiniarnermi maleruagassanik unioqquitsinermut tunngasunik Nakorsaatit Pissassaatit Atorneqartarnerinut Kalaallit Nunaanni Akiuisut aalajangiinerinut naammagittaalliutitunik sularinnittussamik naammagittaalliorfimmik, Kalaallit Nunaanni Nakorsaatit Pissassaatit Atorneqartarnerannik Akiuiniarnermut Ataatsimiititaliamik Naalakkersuisut pilersitsinissaq pillugu maleruagassanik aalajangersaaneq,
- Kalaallit Nunaanni Nakorsaatit Pissassaatit Atorneqartarnerannik Akiuiniarnermut Ataatsimiititaliap katitigaanera sulineralu pillugu maleruagassanik aalajangersaaneq,
- Kalaallit Nunaanni Timersoqatigiit Kattuffiat, Elite Sport Greenland, Nakorsaatit Pissassaatit Atorneqartarnerinut Kalaallit Nunaanni Akiuisut allallu tapiissutisisartut pillugit naatsorsuutaat kukkunersuisarnerlu pillugit maleruagassanik aalajangersaaneq,
- tapiissutit utertillugit akilernerqartarnerat pillugu maleruagassanik aalajangersaaneq, aamma
- pineqaatissiineq pillugu maleruagassanik aalajangersaaneq.

Naammagittaalliuteqarnermut aalajangersakkat kulturikkut sunngiffimmilu sammisaqartitsineq pillugu peqqussummi maleruagassanik ingerlateqqinneqarput. Taamaattorli maannakkut aamma aalajangerneqarluni Naalakkersuisut aalajangiineri allaffissornikkut oqartussanut allanut naammagittaalliutigineqarsinnaangitsut.

Kulturikkut sunngiffimmilu sammisaqartitsineq pillugu peqqussummisulli misileraalluni aaqqissuussinermik Naalakkersuisut pilersitsinnaaneranun tunngavimmik ikkussisoqarpoq, tassunga ilanngullugu misileraalluni ingerlataqarnermut tapiissuteqarsinnaaneq.

Inatsimmik eqqortitsinermik Naalakkersuisut pingaarnertigut nakkutilliinerat aamma nakkutilliinermi suliap isumaginissaanut pisariaqartutut isigineqartunik paasissutissanik piunasaqarsinnaaneq aamma ingerlateqqinneqarluni.

2.1. Atuuffia nassuiaatillu

Siunnersuummi § 1-imi inatsisip atuuffia killilerneqarpoq. Taamaalilluni takuneqarsinnaalluni inatsisartut inatsisaat timersornermut, tassunga ilanngullugu unammilluni timersornermut, aamma timigissarnermut atorneqartoq.

Peqatigisaanik aalajangerneqarpoq inatsisartut inatsisaata inuit ataasiakkaat peqqissuunerat, atugarissaarnerat aamma timikkut, tarnikkut inuuniarnikkullu ineriartorerisa unammillersinnaanerisalu nukittorsarneqarnissaat siunertaralugu timersorneq, tassunga ilanngullugu unammilluni timersorneq aamma timigissarneq tapersersussallugit.

Atuuffia pillugu aalajangersagaq taamaalilluni marloqiusamik siunertaqarpoq, tassa atuuffia killilerniarlugu aamma inatsisartut inatsisaanni pingaarnertut siunertaq kalerriutigalugu.

Atuuffiata annertuujunissaa siunniunneqarsimavoq, taamaalilluni timersorneq kisimi kisianni aamma timigissarneq inatsimmut ilaatinneqarluni. Tamatumunnga ilaatigut tunngavilersuutigineqarpoq timigissarnerup aamma inuit peqqissuunerannut, ingerlalluarnerrannut inuillu ataasiakkaat atugarissaarnerannut tunngatillugu inuiaqatigiinni pingaaruteqartumik siunertaqartuunera, aamma timersorneq timigissarnermut naleqqiullugu killileruminaassinnaammat. Taamaalilluni piviusumik timersorneq timigissarnerlu ataatsitut isigineqalersinnaallutik. Siunnersuummi timigissarnerup ilanngunneqarneratigut timigissarfinnut assigusumillu ingerlataqartunut sammisumik tapiissuteqarnissamut periarfissanik aalajangersakkanik pisussaaffiliisunik pilersitsisoqarpoq.

Inatsisip atuuffia pillugu aalajangersakkami siunertap allanneqarnerani kalerriunneqarpoq inatsisiliortut tungaanniit kissaatigineqartoq inuiaqatigiinni iluaqutaasut siunertat arlallit anguniarlugit timersorneq timigissarnerlu tapersersorneqassasut. Timersorneq timigissarnerlu taamaaliornikkut allap angunissaata ilungersuuteqarnermi sakkunngorpoq. Siunertalli taaneqartut aamma inunnut ataasiakkaanut sammisuummata siunertamik aalajangersakkap aamma kalerriutigaa timersortartut ataasiakkaat pillugit imaluunniit timigissartoq pissutigalugu timersorneq timigissarnerlu tapersersorneqassasut taamaalillunilu timersorneq timigissarnerlu pissutigalugit.

2.2. Timersorneq timigissarnerlu ernumananngitsoq, isumannaatsoq minguitsorlu.

Kapitalip qulequtaatigut timersornerup timigissarnerullu ilisarnaatissaanik pingaarnertut pingaartitat anguniakkallu kalerriutigineqarput. ”Timersorneq minguitsoq” tassaavoq timersornermik eqikkaanermut oqariartaaseq peqqusersuinnermik, ataqqinninnermik akaarinninnermillu tunngaveqartoq taamaalillunilu nakorsaaitit pissassaaitut atorneqartarnerisa aamma timersorluni unamminnermik allanngortiterinnermik pitsaaliuineq akiuinerlu pillugit inatsimmi maleruagassanut attuumassuteqarluni.

Siunnersuummi § 3-mi aalajangersarneqarpoq timersornermi kattuffiit, timersoqatigiiffiit aamma timersortartut klubbiisa kiisalu timigissartarfiit timersornerup timigissarnerullu

ernumanangitsumik isumannaatsumillu toqqammaveqarluni ingerlanneqarnera isumagissagaat. Tamatuma nanginneratut aalajangersakkami aalajangersarneqarpoq kattuffiit il. il. tamatuminnga qanoq ilaatigut qulakkeerinninniassasut. Soorlu takuneqarsinnaasoq tassaniipput meeqqanik pinerliisimannginermik uppernarsaammik pissarsinissamut inatsisikkut aalajangersarneqartumik pisussaaffiup malinneqarnissaat taakkulu pillugit ilisimatitsinissaq, aamma atortut naammaginartut atorneqassasut aamma timersortoq timigissartorlu ajoqusersimasoq pisariaqartumik ikiorserneqarnissaa aamma katsorsartinnissaa sungiusaqqinnissaalu siunertaralugu tapersorneqarnissaa. Tamatuma nanginneratut timersornermut timigissarnermullu toqqammaviit ernumanangitsut isumannaatsullu pillugit maleruagassanik aalajangersaanissamut Naalakkersuisut tunngavissinneqarput.

Siunnersuummi § 4-mi aalajangersarneqarpoq timersornermi kattuffiit il. il. aamma timersornerup timigissarnerullu atortussiat inerteqqutaasut atornagit aamma periutsit inerteqqutaasut atornagit ingerlannissaa aamma nakorsaatit pissassaaitut atorneqartartunik atuinnginnissaq pillugu maleruagassat Nakorsaatit Pissassaaitut Atorneqartarnerinut Kalaallit Nunaanni Akiuisunit aalajangersarneqartut malinneqarnissaat atortinneqarnissaallu isumagissuaat. Nakorsaatit pissassaaitut atorneqarneri akuerisaanngitsumik peqquserluttuliornikkullu angusaqarnermut oqariartaasiuvoq. Tamanna timersortartut akornanni unamminermut tunngavinnut pingaaruteqarluinnartunut akerliulluni, tassunga pingaartumik ilanngullugit peqqusersuinneq ataqpeqatigiinnerlu. Aammattaaq nakorsaatit pissassaaitut atorneqartarneri peqqinnissamut ajoqusiisinnaallutik.

Siunnersuummi § 5-imi aalajangersarneqarpoq timersornermi kattuffiit, timersoqatigiiffiit aamma timersortartut klubbiisa timersortut aamma timersortunut ikorfartuisut timersorluni unamminernik allanngortiteriniarnerni peqataannginnissat namminneq isumagissagaat. Tamatuma nanginneratut timersornermi unamminernik allanngortiteriniarnerup pitsaaliornissaa akiuiniarnerlu pillugit maleruagassanik Naalakkersuisut aalajangersaanissamut piginnaatinneqarput, tassunga ilanngullugu timersorluni unamminernik allanngortiteriniarnerup pitsaaliornissaa akiuiniarnerlu pillugit ataqatigiissaarinermut allattoqarfiup inissinneqarnera pillugu. Aalajangersagaq taanna taamaalilluni ”timersornerup minguitsup” qulakkeerneqarnissaata immikkoortuata aapparaa.

Siunnersuummi § 6-imi qaffasissumik timersorluni unamminermut atatillugu akiliilluni peqquserlutsitsineq pillugu, tassunga ilanngullugu tamanna qanoq paasineqassanersoq, maleruagassanik aalajangersaasoqarpoq, aamma akilerneqarluni peqquserlutsitsinerit pineqaatissinneqarsinnaanerinut tunngavissaq. Pissutsit taamatut ittut pineqaatissiissutaasinnaanannerannut erseqqissumik tunngavissaqarniarluni aalajangersakkap ikkunneqarnissaa naleqquttutut isigineqarpoq, tassa pinerluttulerinerimut inatsit, tassunga ilanngullugu peqquserlunneq pillugu maleruagassat, timersorluni unamminerit allanngortiterinerinut tunngatillugu pisuni attuumassuteqartuni tamani naammattutut isigineqanngimmata.

Nakorsaatit pissassaatitut atorneqartarneri maannakkut kalaallit nunaanni timersornermi timigissarnermilu ajornartorsiutitut annertuutut isigineqanngilaq aamma timersornermi unamminernik allannortiterisartoqarnerisooq paasineqarsimanani. Nakorsaatit pissassaatitut atorneqartarnerisa akiorneqarnissaat kiisalu timersorluni unamminerit allannortiterinerinik akiuinerit pillugit maleruagassanik aalajangersaasoqarnissaa siunnersuutigineqarmat taamaalilluni tamanna pillugu nunani tamalaani isumaqatigiissutinik annerusumik naammassinninniartoqarpoq taamaalillunilu kalaallit timersortartut nunani tamalaani timersorluni unamminerni aamma peqataanissamut periarfissaqarnerat qulakkeerneqarluni. Peqatigisaanik maleruagassat pitsaaliuinerit sunniuteqartutut isigineqarput taamaalillunilu tamanna aqutugalugu siunertamut iluaqutaallutik.

2.3. Pisortani oqartussat akisussaaffiisa suliassaasalu agguarneri

Siunnersuummi kapitali 3-mi pisortani oqartussat akisussaaffiisa suliassaasalu agguarneqarneri aalajangersarneqarput. Pisortani oqartussat tassaapput Naalackersuisut aamma kommunalbestyrelsit.

Siunnersuummi § 7 naapertorlugu pisortani oqartussat timersornermi kattuffiit suleqatigalugit inuiaqatigiinni immikkoortuni tamani timersornerup timigissarnerullu tapersorsorneqarnerisa qulakkeerneqarnissaat ataatsimoorlutik akisussaaffigivaat, tassunga ilanngullugit suli atualinngitsuni aamma atuarfinni, ilinniarfeqarfinni, sunngiffimmi neqeroorutini, suliffeqarfimmi aamma peqqinnissaqarfimmi inunnillu isumaginnittoqarfimmi. Taamaalilluni kalerriutigineqarpoq timersorneq timigissarnerlu init ataasiakkaat sunngiffimminni ingerlatariinnangikkaat, kisianni timersorneq timigissarnerlu aamma immikkoortuni allani tamani tapersorsorniarneqassasoq. Tamanna qanoq pissanersooq qanorlu annertutigissanersooq inatsimmi aalajangersarneqanngilaq, kisianni ingerlataqarfinni inatsisitigut aamma immikkoortuni pineqartuni politikkitigut erseqqinnerusumik malittarisassaliorneqarsinnaallutik.

Siunnersuummi § 8 naapertorlugu pisortani oqartussat timersornermi kattuffiit suleqatigalugit timersorneq timigissarnerlu nunami tamarmi kikkunnit tamanit ingerlanneqarsinnaanera qulakkeerneqarnissaat ataatsimoorlutik akisussaaffigivaat, tassunga ilanngullugit immikkut pisariaqartitsisunut siunnerfeqartumik suliniutit tapersorsornerisigut aamma peqataanissamut aningaasaqarnikkut aporfiusut annikillisinneqarnissaannut suliniuteqarnikkut. Ingerlaqqilluni aalajangersarneqarpoq meeqqat inuusuttullu, utoqqaat, inuit timimikkut susinnaanermikkut akornuteqartut aamma inuit immikkut atugarliortut isiginiarneqarlutillu salliutinneqassasut. Tamatuma nanginneratut timersornerup timigissarnerullu tamanut ammasuunissaat pillugu maleruagassanik Naalackersuisut aalajangersaasinnaanannut piginnaatinneqarput, tassunga ilanngullugit immikkut pisariaqartitsisunut siunnerfeqartunik immikkut suliniutit pillugit aamma aningaasaqarnikkut aporfiusut annikillisinneqarnissaannut suliniuteqarnerit pillugit.

Tamanut ammasuunissaasa qulakkeerneqarnissaa pillugu maleruagassani siunertarineqarpoq sumiluunniit najugaqaraanni, timikkut qanoq pisinnaagaluaaraanniluunniit aamma

inuuniarnikkut tunuliaqutaasoq apeqqutaatinnagu kikkut tamarmik timersornermik timigissarnermillu ingerlatsisinnaanissaat. Tassunga atatillugu oqaatigineqassaaq timersornermut tunngatillugu killiffik pillugu nalunaarusiamit takuneqarsinnaammat inersimasorpasuit ilai, timersornermik timigissarnermillu ingerlataqanngitsut, allammassuk tamatumunnga tunngavilersuutaasoq tassaasoq timikkut tarnikkulluunniit innarluuteqarnertik. Timersornermi timigissarnermilu aningaasaqarnikkut aporfiusinnaasut eqqarsaatigalugit nalunaarusiap takutippaa meeqqat inuusuttullu apersorneqartut ilaannaarannguisa allammassuk timersornermik timigissarnermillu ingerlatsinnginnerminnut pissutaasoq akissaqanngineq, imaluunniit timersorneq timigissarnerlu ingerlatissallugu akisuallaartoq.

Siunnersuummi § 9 naapertorlugu pisortat timersornermi kattuffiit suleqatigalugit timersornermut timigissarnermillu tunngasuni kajumissuseqarluni suliaqarnermut kajumissaaralutillu toqqammavinnut pitsaasunik pilersitsillutillu tapersersuissasut. Tamatuma nanginneratut kajumissuseqarluni suliaqarneq pillugu maleruagassanik aalajangersaasinnaanermut Naalackersuisut piginnaatinneqarput, tassunga ilanngullugu kajumissusillit pillugit nalunaarsuiffimmik pilersitsineq pillugu. Tassunga atatillugu ilisimatitsissutigineqassaaq timersornermut tunngatillugu killiffik pillugu nalunaarusiamit takutinneqarmat kajumissuseqartunik pissarsinissaq aalajangiussisimasaqarnerlu timersoqatigiiffinnut unamminartuni annersat ilagigaat, tamatumunngalu ilaatigut pissutaasoq pikkorissarnissamut neqeroorutit amigaataaneri.

Tamatuma nanginneratut §§ 10-18-mi maleruagassat aalajangersarneqarpoq Naalackersuisut kommunalbestyrelsillu akisussaaffii, piginnaasaqarfii suliaassaallu erseqqissarneqarlutik. Naalackersuisut eqqarsaatigalugit siunnersuummi § 10 naapertorlugu tassunga ilaapput siullermik immikkoortumi neqeroorutit pissarsiarinissaannut taakkulu tamanut ammasuunissaannut akisussaaneq aamma timersornermi timigissarnermilu ernumananngitsuuneq isumannaatsuunerlu pillugit maleruagassat aamma timersornerup timigissarnerullu minguitsuunissaa pillugu maleruagassat eqqortinneqarnissaat.

Tulliatut siunnersuummi §§ 11 aamma 12-mi Naalackersuisut pillugit aalajangersarneqarpoq Kalaallit Nunaanni Timersoqatigiit Kattuffiannut aamma Elite Sport Grenenaldimut aningaasanut inatsisikkut aningaasaliinikkut timersornermut aningaasatigut tapiissuteqarnissamut pisussaaffik. Tamatuma nanginneratut siunnersuummi § 13-mi aalajangersarneqarpoq aningaasaliissutinut taakkununnga piumasarineqartoq kattuffiit taaneqartut nakorsaatit pissassaaitut atorneqartartut pitsaaliornissaat akiuinerlu pillugu Nakorsaatit Pissassaaitut Atorneqartarnerinut Kalaallit Nunaanni Akiuisut maleruagassanik aalajangersagaanik malitsissasut eqqortitsissasullu, aammattaarlu tapiissuteqarnissamut piumasaqaatigineqarluni kattuffiit taaneqartut aamma timersorluni unamminernik allanngortiteriniarnerup pitsaaliornissaa akiuiniarnerlu pillugit Naalackersuisut maleruagassiaannik malinnissasut atorittissasullu. Kiisalu Naalackersuisunut tunngatillugu siunnersuummi § 14-mi timersortarfinnik sanaartornermut, iluarsaassinermut aaqjissuussinernullu Naalackersuisut tapiissuteqarsinnaanerit pillugu maleruagassanik

aalajangersaasoqarluni. Tassunga atatillugu erseqqissarneqarpoq timersortarfinnut aaqqissuussinernullu tapiissutit annerusumik nuna tamakkerlugu nunallu immikkoortuini timersortarfinnut tutsinneqartassat.

Aammattaaq siunnersuummi §§ 15-16 kommunalbestyrelsit akisussaaffii pillugit maleruagassanik aalajangersaasoqarpoq. Siunnersuummi § 15 naapertorlugu tassunga siullermik ilaavoq kommunimi timersornikkut timigissarnikkullu neqeroorutinik peqarnissaanut akisussaaneq aamma tamatumunnga anguniakkanik toqqammavinnillu aalajangersaanissaq. Tulliatut kommunip illoqarfiini nunaqarfiinilu timersornikkut timigissarnikkullu neqerooruteqarnissamut kommunalbestyrelsit ukiut tamaasa pilersaarusiornissamut taassumalu kommunip nittartagaatigut tamanut saqqummiunneqarnissaanut pisussaaffeqarput. Tamanna pillugu kommunalbestyrelsip isumasioererneratigut pilersaarutip taassuma ilusaa imarisaalu pillugu maleruagassanik Naalakkersuisut aalajangersaasinnaaneranun tunngavimmik aamma ikkussisoqarpoq. Kiisalu § 16-imi kommunalbestyrelsit sumiiffimmi timersornermik timigissarnikkullu ingerlatsinernut tapiissuteqarsinnaanerarat, ininut silamilu timersorfiit pilersinnerinut iluarsartuunnerinullu aamma ingerlatsinermi aningaasartuutininut, timersornermi klubbinit pigineqartunut attartorneqartunulluunniit ingerlatsinermi aningaasartuutininut tapiissuteqarsinnaanerarat pillugu maleruagassat aalajangersarneqarlutik. Tassunga atatillugu erseqqissarneqarpoq timersortarfiit sanaartornerinut, iluarsaannerinut aaqqissuunnerinullu tapiissutit sumiiffinni timersorfinnut tapiissutaanerussasut. Aammattaaq tamanna pillugu kommunalbestyrelsit isumasioerernerisigut kommuninut tapiissutit pillugit Naalakkersuisut maleruagassanik aalajangersaasinnaaneranun piginnatitsissut ikkunneqarluni.

Siunnersuummi § 17-imi timersortarfiit sanaartornerinut, iluarsaannerinut aaqqissuunnerinullu imaluunniit ininut silamilu timersorfiit ingerlannerinut aningaasartuutininut kommunalbestyrelsi allalluunniit tapiissuteqarpata tapiissutigineqartut ilaannik Naalakkersuisut utertitsisinnaanerat pillugu maleruagassanik aalajangersaasoqarluni.

Siunnersuummi § 18-mi kommunit agguarnerisa avataanni inatsit una malillugu kommunalbestyrelsimut isumagisassangortinneqarsimasunik suliassanik Naalakkersuisut isumaginnittuunerat aamma Naalakkersuisut kommunimi ataatsimi arlalinniluunniit kommunalbestyrelsimik isumaqatigiissuteqarnermikkut, Naalakkersuisunit pisussaaffigineqartut, suliassat taakku isumagineqarneri tunniussinnaanerarat pillugu maleruagassanik aalajangersaasoqarluni.

2.4. Timersornermi kattuffiit

Siunnersuummi kapitali 4-mmi timersornermi kattuffiit pillugit maleruagassanik aalajangersaasoqarpoq. Tassaniipput Kalaallit Nunaanni Timersoqatigiit Kattuffiat, Elite Sport Greenland, inatsisikkut pilersinneqartoq ataatsimiititaliaq attaviitsoq Nakorsaait Pissassaaitut Atorneqartarnerinut Kalaallit Nunaanni Akiuisut aamma inatsisikkut

pilersinneqartoq naammagittaalliorfik Kalaallit Nunaanni Nakorsaatit Pissasaatitut Atorneqartarnerinut Akiuniarnermut Ataatsimiititaliaq.

Siunnersuummi § 19-mi Kalaallit Nunaanni Timersoqatigiit Kattuffiat pillugu maleruagassanik aalajangersaasoqarpoq. Aalajangersakkami aalajangersarneqarpoq Kalaallit Nunaanni timersornermut timigissarnermullu aaqqissugaasumut kattuffik Kalaallit Nunaata pisortatigut sinniisorigaa, aamma katuffik pisortatigoortumik Kalaallit Nunaannut sinniisuvoq, tassunga ilanngullugit nunanut tamalaanut atatillugu. Aalajangersakkami kattuffiup sulinera malittarisassaliorneqanngilaq, tassa ilaasortat tunngavigalugit kattuffiummat, nammineq inatsisini malittarisassanilu aqutigalugit sulinissani pillugu aalajangersakkanik aalajangersaasoq.

Siunnersuummi § 20-mi Elite Sport Greenland pillugu maleruagassanik aalajangersaasoqarpoq. Aalajangersakkami aalajangersarneqarpoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq, aamma kattuffik Kalaallit Nunaanni Timersoqatigiit Kattuffiat peqatigalugu, pisortatigoortumik Kalaallit Nunaannut sinniisuulluni, tassunga ilanngullugit nunat tamalaat. Elite Sport Greenland pillugu maleruagassanik aalajangersaasoqarnissaa naleqquttutut isumaqarfigineqarpoq. Tamanna suliffeqarfiup suliassatut ingerlateriigaanik maleruagassat allanneqarsimannigtsut inatsisitigut allaqarneruvoq.

Siunnersuummi § 21-mi timersornermi timigissarnermilu nakorsaatit pissasaatitut atorneqartarnerinut suliniutit siunnerfeqarnerannik, pitsaaninngortinnissaannik ataqatigiissarneqarnissaanillu siunertaqartumik ataatsimiititaliamik attaviitsumik, Nakorsaatit Pissasaatitut Atorneqartarnerinut Kalaallit Nunaanni Akiuisunik, Naalakkersuisut pilersitsinissaat pillugu maleruagassanik aalajangersaasoqarpoq, tassunga ilanngullugit pitsaaliuineq akiuinerlu. Aammattaaq siunertaminik naammassinninniarluni ataatsimiititaliaq sunik suliaqassanersoq pillugu maleruagassanik aalajangersaasoqarluni. Tassunga atatillugu ilisimatitsissutigineqassaaq inatsisitigut aalajangerneqartumik tunngaveqanngitsumik manna tikillugu taamaaqataanik aaqqissuussaqarmat, taaneqartoq Nakorsaatit Pissasaatitut Atorneqartarnerinut Kalaallit Nunaanni Akiuisut, nakorsaatit pissasaatigut atorneqartarnerinik nakkutilliinermik aaqqissuisartoq, taassumalu ataani ataatsimiititaliamik pilersitsisoqarsimalluni Nakorsaatit Pissasaatitut Atorneqartarnerinut Akiuniarnermut Ataatsimiititaliaq, maleruagassanik unioqqutitsisoqartillugu pineqaatissiinissamut isummertartoq. Taanna Naalakkersuisut aamma Kalaallit Nunaanni Timersoqatigiit Kattuffiata akornanni angusassatigut isumaqatigiissummi aalajangersarneqarsimavoq. Tassani aalajangersarneqarpoq Kalaallit Nunaanni Timersoqatigiit Kattuffiat aamma Team Grønlandi Nakorsaatit Pissasaatitut Atorneqartarnerinut Akiuniarnermut Ataatsimiititaliamut ilaasortassanik toqqaassasut. Aammattaaq aalajangersarneqarsimalluni Nakorsaatit Pissasaatitut Atorneqartarnerinut Akiuniarnermut Ataatsimiititaliap aalajangiineri Kalaallit Nunaanni Nakorsaatit Pissasaatitut Atorneqartarnerinut Akiuniarnermut Ataatsimiititaliamut suliassanngortinneqarsinnaasut. Kiisalu

aalajangersarneqarsimalluni Kalaallit Nunaanni Timersoqatigiit Kattuffiat taamaalilluni Kalaallit Nunaanni Nakorsaaitit Pissassaaitut Atorneqartarnerinut Akiuiniarnermut Ataatsimiititaliami pimoorussaartoq aamma tusagassiorfiit namminerlu atuagassiaatini aqqutigalugit peqqinnissaq timersornerlu pillugit qaammarsaasoqarluni.

Inatsisitigut aalajangerneqartumik nakorsaaitit pissassaaitut atorneqartarnerinut akiuiniarnermut ataatsimiititaliamik attaviitsumik pilersitsineq nakorsaaitit pissassaaitut atorneqartarnerisa pitsaaliornernik akiuiniarnermillu sulinerup nukittorsarneqarnissaanik kissaateqarnertut isigineqassaaq. Taamaalilluni siunniunneqarpoq inatsisikkut ataatsimiititaliamik pilersitsinikkut ataatsimiititaliaq inatsisitigut pisariaqartumik akuerineqarpoq, inatsimmilu ataatsimiititaliap suliaasaanik allattuinerup peqatigisaanik erseqqissarlugu ataatsimiititaliap sulineranit suut naatsorsuutigineqarnersut. Ataatsimiititaliap inatsisitigut pilersinneqarnerata peqatigisaanik inuit ataasiakkaat inatsisitigut isumannaatsuuneri nukittorsarneqarpoq.

Siunnersuummi § 21, imm. 3 aamma 4-mi aalajangersakkani aamma aalajangersarneqarpoq ataatsimiititaliaq nakorsaaitit pissassaaitut atorneqartarnerinik akiuiniarnermik nakkutilliisunik iluameersumik piginnaatitaasunik piukkunnaateqartunillu ataatsimiititaliaq pilersitsissasoq, kisiannili tamatumunnga periarfissatut allatut imaluunniit tapertaasussatut nakorsaaitit pissassaaitut atorneqartarnerinik akiuiniarnermik nakkutilliinerup tamakkiisumik ilaannakuusumilluunniit isumaginissaa pillugu nunanit allaneersunik nakorsaaitit pissassaaitut atorneqartarnerinik akiuiniartunik suleqateqarnissamik Nakorsaaitit Pissassaaitut Atorneqartarnerinut Kalaallit Nunaanni Akiuisut isumaqatigiissuteqarsinnaasoq. Tassunga atatillugu ilisimatitsissutigineqassaaq Nakorsaaitit Pissassaaitut Atorneqartarnerinut Kalaallit Nunaanni Akiuisut maannakkut Anti Doping Danmarkimik suleqateqarmata.

Siunnersuummi § 22-mi Nakorsaaitit Pissassaaitut Atorneqartarnerinut Kalaallit Nunaanni Akiuisut qanoq katitigaassarnersut allaaserineqarpoq. Tamanna pillugu aalajangersarneqarpoq ataatsimiititaliaq tallimanik ilaasortaqaassasoq Kalaallit Nunaanni Timersoqatigiit Kattuffiannit, Elite Sport Greenlandimit aamma Nunatsinni Nakorsaaneqarfimmit inassuteqartoqarneratigut Naalakkersuisunit toqqarneqartussat, tassungalu atatillugu inassutigineqartut immikkut ilisimasaqarnissaat pillugu piumasaaqatigineqarluni. Aalajangersakkami imm. 4-mi aalajangersarneqarpoq ataatsimiititaliamut allattoqarfikkut Kalaallit Nunaanni Timersoqatigiit Kattuffiat ikiuissasoq.

Siunnersuummi §§ 23 aamma 24-mi aalajangersakkani pineqarput aqqissugaasumik timersornerit timigissarnerillu avataanni nakorsaaitit pissassaaitut atorneqartarneri pitsaaliornissai akiorneqarnissaalu. Taamaalilluni § 23-mi nakorsaaitit pissassaaitut atorneqartarnerisa pitsaaliornissai akiorneqarnissaalu pillugit timigissarfinnik ingerlataqarfinnillu allanik timersornikkut imaluunniit timigissarnikkut sammisaqartitsinermik neqerooruteqartut imaluunniit taakkununga eqqaanartunik sammisaqartitsisut aamma Kalaallit Nunaanni Timersoqatigiit Kattuffiannut ilaangitsunik

Nakorsaatit Pissassaatit Atorneqartarnerinut Kalaallit Nunaanni Akiuisut suleqateqarnissamik isumaqatigiissusiornissaa pillugu maleruagassat aalajangersarneqarput. Siunnersuummi § 24 malillugu maleruagassanut taakkununga ilaapput aamma nalunaaqutsersuineramik aaqqissuussineq, taanna naapertorlugu taamatut suleqatigiinnissamut isumaqatigiissuteqarsimanertik pillugu timigissarfiit taakku il. il. atuisunut paasissutissiinissamut pisussaaffearlutik.

Siunnersuummi § 25 naapertorlugu inuit nakorsaatinik pissassaatit atorneqartartunik atuisimanerat pillugu pineqaatissinneqarsimasut pillugit paasissutissanik imaqartumik elektronikkikkut nalunaarsuiffimmik Nakorsaatit Pissassaatit Atorneqartarnerinut Kalaallit Nunaanni Akiuisut ingerlataqassaaq. Aalajangersakkamut aamma ilaapput nalunaarsuiffimmi paasissutissat qanoq annertutigisumik ingerlateqqinneqarsinnaanersut pillugu aalajangersakkat, aammattaarlu erseqqissarneqarluni peqataasut, nalunaarsuiffimmi paasissutissanut isersinnaasut, paasissutissat pineqartut taakku eqqarsaatigalugit nipangiussisussaataasut. Tamatuma nanginneratut nalunaarsuiffiup ingerlanneqarnera pillugu, tassunga nalunaaruteqartarneq pillugu aamma nalunaarsuiffiup aserfallatsaaliorneqarnissaa pillugu maleruagassanik erseqqinnerusunik Naalackersuisut aalajangersaasinnaanerat pillugu aalajangersakkamik aalajangersaasoqarpoq.

Nalunaarsuiffik pillugu oqaatigineqassaaq taamatut nalunaarsuiffimmik ingerlataqarneq nakorsaatit pissassaatit atorneqartarneri pillugit maleruagassat atortinnissat pisariaqartoq.

Siunnersuummi § 26-mi nakorsaatit pissassaatit atorneqartarnerinik akiuiniarnermi maleruagassanik unioqqutitsinermut tunngasunik Nakorsaatit Pissassaatit Atorneqartarnerinut Kalaallit Nunaanni Akiuisut aalajangiinerinut naammagittaalliuutinik sularinnittussamik naammagittaalliorfimmik, ”Kalaallit Nunaanni Nakorsaatit Pissassaatit Atorneqartarnerinut Akiuiniarnermut Ataatsimiititaliamik” Naalackersuisut pilersitsissasut pillugu maleruagassanik aalajangersaasoqarpoq. Tassunga atatillugu ataatsimiititaliap katitigaanera allattoqarnikkullu ikiorneqarnissaa pillugu aalajangersakkanik aalajangersaasoqarpoq. Tassannga takuneqarsinnaavoq ataatsimiititaliap pingasunik ilaasortaqaassasoq, Nunatsinni Eqqartuussisumit, Nunatsinni Nakorsaaneqarfimmit aamma Kalaallit Nunaanni Timersoqatigiit Kattuffiat aamma Elite Sport Greenlandi peqatigiillutik inassuteqarnerisa kingorna Naalackersuisunit toqqarneqartussat. Tassunga atatillugu inassutigineqartut sutigut immikkut ilisimasaqarnissaat pillugu aalajangersakkanik aalajangersaasoqarpoq. Tassani siunertarinearpoq suliassap matuma pineqartup iluani naammagittaalliorfittut sulinissamut ataatsimiititaliap piginnaasaqarnissaata qulakkeerneqarnissaa.

2.5. Aningaasalersuineq allaffissornerlu

Siunnersuummi kapitali 5-imi aningaasalersuineq allaffissornerlu pillugit maleruagassanik aalajangersaasoqarpoq, tassani aalajangersarneqarluni timersornermut timigissarnermullu aningaasartuutit tamarmik kommunimit akilerneqassapput, aningaasartuutit tamakkiisumik

ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat.

Aammattaq aalajangersarneqarpoq kommunit agguarnerisa avataannii aningaasartuutit Naalackersuisunit isumagineqartassasut.

2.6. Naatsorsuutit kukkunersiuinerlu

Siunnersuummi § 28, imm. 1-imi Kalaallit Nunaanni Timersoqatigiit Kattuffiat, Elite Sport Greenland aamma Nakorsaait Pissasaatit Atorneqartarnerinut Kalaallit Nunaanni Akiuisut tamatumunnga piffissaliussatut Naalackersuisut aalajangersagaat nallertinnagu ukiumut qaangiuttumut naatsorsuusiortiusumut naatsorsuutiminnik kukkunersiorneqarsimasunik allatigullu naatsorsuutininut atortunik Naalackersuisunut nassiussissasut pillugu maleruagassanik aalajangersaasoqarpoq.

Kalaallit Nunaanni Timersoqatigiit Kattuffiat eqqarsaatigalugu aamma § 28, imm. 2-mmi aalajangersarneqarpoq naatsorsuutininut ilanngullugit immikkut kattuffiit, timersoqatigiiffiit, timigissartarfiit il. il. kattuffimmut ilaasunut naatsorsuutit kukkunersiorneqarsimasut nassiunnissaannut pisussaaffik aalajangersarneqarpoq.

Siunnersuummi § 29-mi aalajangersarneqarpoq § 28, imm. 1-imi taaneqartumit allaanerusunit Naalackersuisunit tapiissutinik pissarsisartut allat tamatumunnga noqqaasoqarneratigut tapiissutit siunertamut aningaasaliiffigineqartumut atorneqarsimani pillugit uppersaassasut. Taamaalilluni naatsorsuutit suliarineqarneri imaluunniit kukkunersiorneqarneri pillugit aallaaviatigut piumasqaateqanngilaq, Naalackersuisulli siunnersuummi § 31 naapertorlugu tamanna pillugu maleruagassanik aalajangersaasinnaallutik.

Siunnersuummi § 30-mi aamma tapiissutit aningaasaliissutigineqarsimasut utertillugit akilerneqarnissaannut maleruagassanik aalajangersaasoqarpoq.

Siunnersuummi § 31-mi tapiissutit atorneqarsimaniinut akuersineq aamma uppersaait pillugit, naatsorsuutit kukkunersiuinerlu pillugit aamma tapiissutit utertillugit akilerneqarnissaat pillugu maleruagassanik Naalackersuisut aalajangersaasinnaanerannut tunngavissiisoqarpoq.

2.7. Naammagittaalliuuteqarneq

Siunnersuummi § 32, imm. 1-imi aalajangersarneqarpoq inatsisit una naapertorlugu Naalackersuisut aamma kommunalbestyrelsip aalajangiineri allaffissornikkut oqartussanut allanut suliassanngortinneqarsinnaanngitsut.

§ 32, imm. 2-mi aalajangersarneqarpoq Naalackersuisut isumaqatigiissuteqarfigalugit kommunalbestyrelsinut tunniunneqarsimasunut suliassanut tunngasuni

kommunalbestyrelsimit aalajangiinerit aalajangiinerup nalunaarutigineqarneraniit sapaatit akunneri sisamat qaangiutsinnagit Naalakkersuisunut suliassanngortinneqarsinnaasut.

Tamanna kulturikkut sunngiffimmilu sammisassaqtitsineq pillugu peqqussummi manna tikillugu maleruagassanik atuuttunik ingerlatitseqqinneruvoq.

2.8. Misileraalluni aaqqissuussinerit

Kulturikkut sunngiffimmilu sammisassaqtitsineq pillugu peqqussut assigalugu siunnersuummi § 33-mi misileraalluni Naalakkersuisut aaqqissuussisinnaanerannut tunngavissaq ikkunneqarpoq, tassunga ilanngullugu misileraalluni ingerlataqarnermut tapiissuteqarsinnaaneq. Misileraalluni ingerlataqarneq tassaavoq ingerlatat inatsisip atuuffiata iluani ingerlanneqartut inatsimmilu aalajangersakkat aqutigalugit piviusunngortinneqarsinnaanngitsunik periarfissarsiorluni misileraanissaq. Ingerlatat ingerlataagallartutut ingerlanneqassapput suliassa qarfiullu pineqartup ineriartortinnerani ator neqarsinnaasunik misilittagassarsiornernut ilaassalluni.

2.9. Nakkutilliineq pineqaatissiinerillu

Siunnersuummi § 34-mi aalajangersarneqarpoq inatsimmik eqqortitsinermik Naalakkersuisut pingaarnertigut nakkutilliissasut aamma inatsit malillugu suliassanik isumaginninnissamut pisariaqartutut isigineqartunik paasissutissanik kommunalbestyrelsimut piumasaqarsinnaallutik.

Nutaatut inatsisartut inatsisaanni aalajangersakkat arlallit arlaannik unioqutitsisoq akiliisussanngortinneqarnissaanut periarfissaq pillugu maleruagassanik aalajangersaasoqarluni aamma inatsisartut inatsisaat naapertorlugu najoqqutassanik unioqutitsisoqarneranut pineqaatissiinissaq pillugu maleruagassanik aalajangersaasoqarluni. Aalajangersakkat pineqartut tassaapput § 6, imm. 1-imi akiliilluni peqquserlutsitsinermut inerteqqutaasut, § 24, imm. 1 aamma 2-mi nalunaaqutsiinissamut aaqqissuussinermik unioqutitsineq, aamma § 25, imm. 3-mi nakorsaatit pissassaatit ator neqartarnerinut nalunaarsuiffimmi paasissutissanut tunngasuni nipangiussisussaataitanermik unioqutitsineq.

2.10. Atuutilersitsineq, atorunnaarsitsineq ikaarsaarnermilu aalajangersakkat Siunnersuut siunnersuutigineqarpoq ulloq 1. januar 2017 atuutilissasoq.

Inatsisip atulersinnerata peqatigisaanik timersorneq timigissarnerlu eqqarsaatigalugu kulturikkut ingerlatsineq sunngiffimmilu sammisassaqtitsineq pillugit Inatsisartut peqqussutaanni nr. 10, 21. maj 2002-meersumi maleruagassat atorunnaarput.

Kiisalu aalajangersarneqarluni peqqussut taaneqartut naapertorlugu maleruagassat aalajangersarneqarsimasut imaluunniit ingerlatiinnarneqartut atuutiinnassapput, taakku atorunnaarsinneqarnissaasa imaluunniit inatsisartut inatsisaat manna imaluunniit inatsisit allat naapertorlugit maleruagassanik aalajangersarneqartunik taarserneqarnissaasa tungaannut.

3. Pisortanut aningaasatigut allaffissornikkullu kingunerisassai

3.1. Siunnersuummi aalajangersakkat pisortani oqartussanut pisussaaffiliisut

Siunnersuut malillugu Naalackersuisut kommunalbestyrelsip timersornermi kattuffiit suleqatigalugit timersornerup timigissarnerullu inuiaqatigiinni immikkoortuni tamani tapersorsorneqarnissaa aamma timersorneq timigissarnerlu nunami tamarmi kikkunnut tamanut ammasuunissaa qulakkiissavaat. Tassaniippoq anguniakkat taakku anguneqarnissaannut pisussaaffik, tunngavigineqarlunili tamanna pisinnaaneq naapertorlugu pissasoq, tassunga ilanngullugu qaqugukkulluunniit aningaasaliissutigineqartut iluanni. Tassunga atatillugu oqaatigineqassaaq timersorneq timigissarnerlu inuiaqatigiinni assigiinngitsorpasuaru tapersorsorneqareemat, aamma nunami sumiiffiit tamakkiusallugit timersornikkut timigissarnikkullu neqerooruteqareenera.

Timersornikkut timigissarnikkullu neqeroorutit tamanut ammasuunissaannut pisussaaffimmut tunngatillugu siunnersuummi aalajangersarneqarpoq inunnut immikkut pisariaqartitsisunut siunnerfeqartumik suliniuteqarnikkut aamma peqataanissamut aningaasaqarnikkut aporfiusinnaasut annikillisarlugit suliniuteqarnikkut pisinnaasoq. Aammattaaq aalajangersarneqarpoq immikkoortut uku isiginiarneqarlutillu salliutinneqassasut: meeqqat inuusuttullu, utoqqaat, inuit pisinnaanermikkut akornutillit aamma inuit immikkut atugarliortut. Tamatuma piviusumik malinneqarniarneqarnissaa timersornermi kattuffiit suleqatigalugit pisortanit suliassaavoq. Tamanna aallaaviatigut aningaasanik allanik ilasisoqarnissaanik tunngaveqanngilaq kisianni timersornermut aningaasaliissutaareersut aningaasat pingaarnersiorneqassallutik.

Siunnersuummi aamma aalajangersarneqarpoq kajumissuseqarluni suliaqarnermut Naalackersuisut kommunalbestyrelsillu kajumissaaralutillu, tapersersuillutik pitsaasunik toqqammavissiissasut. Tamanna pisussaaffiliivoq, toqqammavinnilli allanik pinngitsoorani ilaseqqittoqarnissaanik tamanna piumasaqarnani, tassa tassunga aningaasanik pisariaqartinneqartunik pissarsineq aamma timersornermut aningaasaliissutaareersut pingaarnersiorneqarnerisigut pisinnaammat. Aamma kajumissuseqarluni suliaqarnermut assigiinngitsutigut Naalackersuisut kommunalbestyrelsillu tapiissuteqartareerlutik.

Tassunga atatillugu oqaatigineqassaaq Kalaallit Nunaanni Timersoqatigiit Kattuffiannut kiisalu Elite Sport Greenlandimut tapiissutit ilai siunertanut aalajangersimasumut atugassanngortinneqareersimammata, aammattaaq Naalackersuisut aamma Kalaallit Nunaanni Timersoqatigiit Kattuffiannik kiisalu Elite Sport Greenlandimik ukiunut sisamanut angusaqarnissamik isumaqatigiissuteqarnikkut isiginninniartoqarlunilu pingaarnersiuisoqarsinnaammat.

Siunnersuut malillugu timersornikkut timigissarnikkullu assigiinngitsut neqeroorutit pilersinnissaannut, neqeroorutiginissaannut tamanullu ammasuunissaannut, aamma timersornermi timigissarnermilu ernumanartoqannginnera isumannaatsuuneralu pillugit

maleruagassat aamma timersornerup timigissarnerullu minguitsuunissaa pillugu maleruagassat eqqortinneqarnissaannut Naalakkersuisut pingaarnertigut akisussaapput. Akisussaaffiup taassuma isumagineqarnera aningaasatigut kinguneqassasoq nalilerneqanngilaq, tassa neqeroorutit tamanullu ammasuuneri siunnersuummi § 8-mut atatillugit isigineqassammata. Maleruagassat taaneqartut eqqortinneqarnissaat eqqarsaatigalugu tamanna pillugu inatsimmi maleruagassat aalajangersarneqartut, nakorsaait pissassaaitut atorneqartarnerinik akiuiniarnermi maleruagassanik Nakorsaait Pissassaaitut Atorneqartarnerinut Kalaallit Nunaanni Akiuisut aalajangersagai aamma maleruagassanik timersornermi kattuffiit malinninnermik atortitsinermillu qulakkeernerat tamanna pissaaq.

Timersortarfinnut, iluarsaassinermut timersortarfinnillu aaqqissuussinermut tapiissutit pillugit maleruagassat eqqarsaatigalugit tassani pineqarpoq maleruagassat atuuttut ingerlateqqinneqarneri, taamaattorli maannakkut erseqqissarneqarluni timersortarfinnut aaqqissuussinernullu Naalakkersuisut tapiissuteqarnerat annerusumik nuna tamakkerlugu aamma nunap immikkoortuini timersortarfinnut tapiissutaassasut. Tamanna periutsimik maleruagassanik allanneqarsimannngitsunik inatsisitigut allanneqarluni.

Kommunalbestyrelsit akisussaaffiat eqqarsaatigalugu tassani pineqarpoq maleruagassanik periutsinillu atuuttunik ingerlatitseqqinneq, taamaattumik tamanna aamma kommuninut aningaasaqarnikkut allaffissornikkullu kinguneqartitsisussaanani.

3.2. Nakorsaait Pissassaaitut Atorneqartarnerinut Kalaallit Nunaanni Akiuisut aamma Kalaallit Nunaanni Nakorsaait Pissassaaitut Atorneqartarnerinut Ataatsimiititaliamik pilersitsineq

Nakorsaait Pissassaaitut Atorneqartarnerinut Kalaallit Nunaanni Akiuisut aamma Kalaallit Nunaanni Nakorsaait Pissassaaitut Atorneqartarnerinut Ataatsimiititaliamik pilersitsineq ataatsimiititaliani ilaasortat akissarsiaqartinnerinut inatsimmilu suliassat aalajangersarneqartut ataatsimiititaliamit isumagineranut aningaasartuutit kinguneqassaaq.

Ataatsimiititaliani ilaasortat Inatsisartuni Naalakkersuisunilu ilaasortat akissarsiaqartinneqarnerat il.il. pillugu Inatsisartut inatsisaat nr. 22, 18. december 2003-meersumi, kingullermik Inatsisartut inatsisaat nr. 3, 3. juni 2015-imi allannngortinneqartumi tamanna pillugu maleruagassat malillugit akissarsiaqartinneqassapput. Maleruagassat taakku malillugit akissarsiaqartitsineq ullut ataatsimiiffiusut amerlassusaannut naleqqiullugu pissaaq, aamma nunagisap avataani ataatsimiinnermi peqataanermi aamma akiliunneqarluni angalanerit najugaqarnerillu kiisalu tjenestemandinut maleruagassat atuuttut malillugit ullormusiaqartitsinerit akilerneqassallutik. Nakorsaait Pissassaaitut Atorneqartarnerinut Kalaallit Nunaanni Akiuisuni ukiumut pingasoriarluni – sisamariarluni ullumik ataatsimik-marlunnik sivisuuseqartumi ataatsimiittarnissaaq naatsorsuutigineqarpoq, taamaattumik aningaasartuutit 30-80.000 kr.-inut missiliorneqarlutik, kiisalu Kalaallit Nunaanni Nakorsaait Pissassaaitut Atorneqartarnerinut Ataatsimiititaliaq ukiumut marluk – pingasoriarluni

ullormik ataatsimik-marlunnik sivisussuseqartumik ataatsimiittarnissaq
naatsorsuutigineqarluni, taamaattumik aningaasartuutit 10-30.000 kr.-inut missiliorneqarlutik.

Taakkununnga ilanngutissapput nunagisap avataani ataatsimiinnernut peqataasunut
ataatsimiititaliani ilaasortat angalanerini aningaasartuutit aamma ullormusianut
aningaasartuutit. Tassunga aningaasartuutit nunagisap avataani ataatsimiinnernut
peqataasunut ilaasortamut ataatsimut ukiumut 50.000 kr.-it missaannut missiliorneqarput.

Nakorsaatit Pissasaatit Atorneqartarnerinut Kalaallit Nunaanni Akiuisut inatsisikkut
peqqussutaasunik suliaasanik isumaginninnermi aningaasartuutit, tassunga ilanngullugit
tassunga atatillugu allattoqarfimmi ikiuineq, apequtaassaaq suliaasat ataasiakkaat
annertussusaat. Timersornermi timigissarnermilu nakorsaatit pissasaatit
atorneqartarnerinik pitsaaliuinnermut akiuinnermullu tunngasuni qaammarsaanermut
inerisaanermillu suliaqarnermut, nakorsaatit pissasaatit atorneqartarneri pillugit nunatsinni
maleruagassanik aalajangersaanermut, nakorsaatit pissasaatit atorneqartarnerinik
nakkutilliinnermut aamma nakorsaatit pissasaatit atorneqartarneri pillugit nunatsinni
maleruagassanik unioqquitsinnermi pineqaatissiinnermut atasunik aningaasartuuteqarnissaq
pingaartumik naatsorsuutigisariaqassaaq. Ukiumut aningaasartuutit 2-300.000 kr.-it
missaannik annertussuseqassasut nalilerneqarpoq. Allattoqarnikkut ikiuineq siunnersuut
naapertorlugu Kalaallit Nunaanni Timersoqatigiit Kattuffiannit isumagineqassaaq,
taamaattumik naatsorsuutigineqarluni tassunga aningaasaliissutit ilai suliaasap taassuma
isumagineqarneranut atugassanngortinneqassasut. Tassunga atatillugu
ilisimatitsissutigineqassaaq Kalaallit Nunaanni Timersoqatigiit Kattuffiat manna tikilllugu
suliaasanik taakkuninnga annertuumik isumaginnimmat.

Kalaallit Nunaanni Nakorsaatit Pissasaatit Atorneqartarnerinut Ataatsimiititaliap
inatsisitigut peqqussutaasunik suliaasanik isumaginninnerani aningaasartuutit, tassunga
ilanngullugit tassunga atasunik allattoqarnikkut ikiuineq, tassatuaassaaq nakorsaatit
pissasaatit atorneqartarneri pillugit nunatsinni maleruagassanik unioqquitsinnermut
tunngasuni aalajangiinnerit pillugit suliaasannngortitsinnermi sulianik suliarinninneq.
Naatsorsuutigineqarpoq naammagittaalliuutit taamatut ittut amerlassusaat annertussanngitsut,
taamaattumik suliaasanik suliarinninnermut aningaasartuutit aningaasaliissutit iluanni
isumagineqarnissaat naatsorsuutigineqarluni.

4. Inuussutissarsiortunut aningaasatigut allaffissornikkullu kingunerisassai

Siunnersuut nakorsaatit pissasaatit atorneqartarneri pitsaaliornissai akiorneqarnissaalu
pillugit timigissarfinnik ingerlataqarfinnillu allanik timersornikkut imaluunniit
timigissarnikkut sammisaqartitsinnermik neqerooruteqartut imaluunniit taakkununnga
eqqaanartunik sammisaqartitsisut aamma Kalaallit Nunaanni Timersoqatigiit Kattuffiannut
ilaanngitsunik Nakorsaatit Pissasaatit Atorneqartarnerinut Kalaallit Nunaanni Akiuisut
suleqateqarnissamik isumaqatigiissusiornissaa pillugu aalajangersakkanik imaqarpoq.

Isumaqatigiissutit taakku qulakkiissavaat Kalaallit Nunaanni Timersoqatigiit Kattuffiannut ilaasunut immikkut kattuffinnut, timersoqatigiiffinnut, timersornermi klubbinut timigissartarfinnullu atuuttunik maleruagassanik malinnittunik nakorsaatit pissassaatit atorneqartarnerinik nakkutilliinernik pineqaatissiisarnernillu timigissartarfiit taakku il.il. naammassisaqartarnerat. Suleqatigiinnissamut isumaqatigiissutit uku naapertorlugit sullissinernut akileeqqusinissamut Nakorsaatit Pissassaatit Atorneqartarnerinut Kalaallit Nunaanni Akiuisut tunngavissinneqarpoq.

Siunnersuummi aamma Nakorsaatit Pissassaatit Atorneqartarnerinut Kalaallit Nunaanni Akiuisut tamannalu pillugu allagarsiisimanertik pillugu suleqatigiinnissamut isumaqatigiissuteqarsimanertik pillugu timigissarfiit il.il. taakku paasissutissiinissamut pisussaaffilerneqarput.

Aalajangersakkat taakku kingunerissavaat nakorsaatit pissassaatit atorneqartarnerinik nakkutilliinerit allagarsiisarnerillu atortinneqarnerinut aningaasartuuteqarneq. Taakkununnga aningaasartuutit annikitsuussasut nalilerneqarpoq aamma timigissartarfiit pineqartut nammineq akilertassallugu.

Siunnersuut allatigut inuussutissarsiortunut allaffissornikkut kinguneqartitsinissaa naatsorsuutigineqanngilaq.

5. Avatangiisinut, pinngortitamut innuttaasullu peqqissusiannut kingunissai

Siunnersuut avatangiisinut imaluunniit pinngortitamut kinguneqartitsinissaa naatsorsuutigineqanngilaq.

Siunnersuut inuit peqqissusiannut ajunngitsumik sunniuteqassasoq naatsorsuutigineqarpoq, tassa timersorneq timigissarnerlu inuit ataasiakkaat peqqissusiannut ingerlalluarnernannullu iluaqutaasumik sunniuteqartarnera takuneqarsinnaammat.

6. Innuttaasunut kingunissai

Pisortat timersornermilu kattuffiit timersornermut timigissarnermullu tunngasutigut akisussaaffiitut, piginnaasaannut suliassaannut toqqammaviit erseqqinnerulernerannik innuttaasut misigisaqassapput.

Timersornerup timigissarnerullu inuiaqatigiinni immikkoortuni tamani tamanut ammasuunissaanut aamma kajumissuseqarluni ingerlataqarnerit pillugit siunnersuummi aalajangersakkat innuttaasunut ataatsimut isigalugit aamma timersornerup timigissarnerullu iluani inuit ataasiakkaat sammisaqarnissamut periarfissaqarnerannut sunniuteqassasoq naatsorsuutigineqarpoq.

Nakorsaatit Pissassaatit Atorneqartarnerinut Kalaallit Nunaanni Akiuisut aamma Kalaallit Nunaanni Nakorsaatit Pissassaatit Atorneqartarnerinut Ataatsimiititaliaq pillugu

maleruagassat nakorsaaitit pissassaaitut atorneqartarnerinik akiuiniarneq pillugu maleruagassanik atortitsinermit tunngatillugu innuttaasut inatsisitigut isumannaatsuunerat qulakkiissavaat.

7. Kingunerisassai pingaaruteqartut allat

Siunnersuut naatsorsuutigineqanngilaq allatigut annertuunik kinguneqassasoq.

8. Oqartussaasunut suliniaqatigiiffinnullu tusarniaaneq

Inatsisissatut siunnersuut piffissami 16. december 2015 – 20. januar 2016 tusarniaassutigineqarpoq.

Forslaget har været til høring hos følgende høringsparter:

Naalackersuisut Siulittaasuata Naalackersuisoqarfia	Peqqissutsimut Naalackersuisoqarfik
Ineqarnermut, Sanaartornermut Attaveqaqatigiinnermullu Naalackersuisoqarfik	Aningaasaqarnermut Naalackersuisoqarfik
Aatsitassanut Ikummatissanullu Naalackersuisoqarfik	Aalisarnermut, Piniarnermut Nunalerinnermullu Naalackersuisoqarfik
Inuussutissarsiornermut, Suliffeqarnermut Niuernerullu Naalackersuisoqarfik	Ilaqutariinnermut, Naligiissitaanermut Isumaginninnermullu Naalackersuisoqarfik
Pinngortitamut, Avatangiisinut Inatsisinillu Atuutsitsinermit Naalackersuisoqarfik	Nunanut allanut pisortaqarfik
KANUKOKA	Kommune Kujalleq
Kommuneqarfik Sermersooq	Qeqqata Kommunua
Qaasuitsup Kommunua	KANUNUPE
Sulisartut Højskolia	Knud Rasmussenip Højskolia
Avannaani Ilinniarnertuunngorniar- fik/Nordgrønlands Gymnasium	Qeqqani Ilinniarnertuunngorniar- fik/Midgrønlands Gymnasiale Skole
Kalaallit Nunaanni Teknikimik Ilinniarfik (KTI)	Campus Kujalleq
INUILI	Imarsiornermik Ilinniarfik
NI-Nuuk	Peqqissaanermik Ilinniarfik
Ilisimatusarfik	Perorsaanermik Ilinniarfik
Savaatilinnngorniat Ilinniarfiat	Aalisarnermik Piniarnermillu Ilinniarfik
Eqqumiitsuliornermik Ilinniarfik	NUSUKA
Kalaallit Nunaanni Sulisitsisut (GA)	SIK
ASG	IMAK
AK	Avalak
ILI ILI	Siunnersuisartunik Ilinniarfik
Oqaatsinik Pikkorissarfik	MIO

Inuit Pisinnaatitaaffiinut Kalaallit Nunaata Siunnersuisoqatigiivi	Kalaallit Nunaanni Naalagaaffiup Aallartitaa
Nanu Børn	MIBB Meeqqat Inuunerissut
Elite Sport Greenland	Sorlak
Timersoqatigiiffiit Kattuffiat	

Tusarniaanermi akissutit aqqaneq marluk tiguneqarput, taakkunanga uku oqaaseqaateqarsimanatik: Ilaqutariinnermut, Naligiissitaanermut Isumaginninnermullu Naalackersuisoqarfik, Iisimatusarfik, Ilinniagartuut Kalaallit Nunaanni Kattuffiat (ASG) aamma Kalaallit Nunaanni Sulisitsisut.

Tusarniaaffigineqartut uku siunnersuummut oqaaseqaateqarput: IMAK, SIK, Meeqqat Illersuisuat (MIO), KANUKOKA, Kommune Kujalleq, Qeqqata Kommunia, Qaasuitsup Kommunia aamma Kalaallit Nunaanni Timersoqatigiit Kattuffiat.

Tusarniaanermi akissutit aamma siunnersuutip inatsisilerinikkut misissorneqarnera siunnersuummi ataasiakkaanik allannguuteqartitsippot erseqqissaaffigineqarlutillu aamma siunnersuummut nassuiaatini erseqqissaasoqarpoq.

Siunnersuummi § 3, imm. 2-mi aalajangersakkat aallartinnerani ”ilaatigut” ikkunneqarpoq. Taamaaliortoqarpoq aalajangersakkami tamakkiisumik allattuisoqannginnera erseqqissarniarlugu.

Siunnersuummi § 6, imm. 1 aqutigalugu qaffasissumik timersorluni unammineq qanoq paasisasaanersoq erseqqissaaffigineqarpoq.

Siunnersuummi § 13, imm. 1 aamma 2 allanngortinneqarput, tassa maleruaqqusanik peqqarniitsumik utikattumillu unioqutitsinerit kingunerannik tapiissutisisinnaatitaaneq atorunnaassammat aamma tapiissutit tunniunneqareersut utertillugit akilersorneqarnissaat piunasaqaataalerluni.

Siunnersuummi § 15, imm. 2 aqutigalugu erseqqissaaffigineqarpoq kommunip illoqarfiini nunaqarfiinilu timersornermik timigissarnermillu neqeroorutit pillugit ukiumoortumik pilersaarutip kommunip nittartagaatigut tamanut saqqummiunneqartarnissaa.

Siunnersuummi § 15-imi imm. 3 nutaaq tamanna pillugu kommunalbestyrelsit isumasioreernerisigut kommunimi illoqarfinni nunaqarfinnilu timersornikkut timigissarnikkullu neqeroorutit pillugit ukiumoortumik pilersaarutip ilusaa imarisaalu pillugu Naalackersuisut aalajangersaasinnaanannut tunngavik ikkunneqarpoq.

Siunnersuummi § 16-imi imm. 1 nutaaq timersorfinnik sanaartornermut, iluarsaassinnermut aaqqissuussinnermullu kommunalbestyrelsip tapiissuteqarsinnaanannut tunngavik aamma

imm. 2-mi taamatut tapiissutit sumiiffinni timersortarfinnut tapiissutaanerusarnissaannik erseqqissaarneq ilanngunneqarpoq. Manna tikillugu imm. 1 aamma 2-iusimasut tamatuma kingorna imm. 3 aamma 4-nngorput. Aammattaaq imm. 5 nutaaq kommunalbestyrelsit tamanna pillugu isumasioernerisigut kommunit tapiissutaat pillugu maleruagassanik Naalakkersuisunut piginnaatitsissut ikkunneqarpoq.

Siunnersuummi § 17 aqqutigalugu § 16-imi allannguisoqarneranut naleqqiullugu kingornatigut iluarsiiisoqarpoq.

Siunnersuummi § 28, imm. 1 allanngortinneqarpoq, tassa Kalaallit Nunaannit Timersoqatigiit Kattuffiat aamma Elitesport Greenland assigalugit Nakorsaatit Pissassaatit Atorneqartarnerinut Kalaallit Nunaanni Akiuisut ukiumut naatsorsuuteqarfiusumut kingullermut tunngatillugu naatsorsuutiminnik iluarsisanik naatsorsuinermilu atortunik allanik tunniussiffissaq Naalakkersuisut aalajangersagaat nallertinnagu Naalakkersuisunut nassiussisussanngorlugit. Aamma § 28, imm. 3-mut ilanngunneqarpoq naatsorsuutit kukkunersiuisumit avataaneersumit naalagaaffimmit akuerisaasumit nalunaarsorneqarsimasumillu kukkunersiorneqartarnissaannut tunngassutalik

Siunnersuummi § 35, imm. 1-imi nutaatut erseqqissaatigineqarpoq inatsisip eqqortinneqarneranik Naalakkersuisut pingaarnertigut nakkutilliisuunerat. Manna tikillugu imm. 1-iusimasoq kingorna imm. 2-nngorpoq. Imm. 2-mi ”kommunalbestyrelsi” peerneqarpoq, taamaalilluni inatsit malillugu suliassamik isumaginninnissamut pisariaqartunik paasissutissanik pissarsiniarnissamut Naalakkersuisunut tunngavimmi taamaallaat kommunalbestyrelsinut siunnerfeqarnani.

Siunnersuummi § 36, imm. 2-mi nutaatut atorunnaarsitsinermik aalajangersagaq aalajangersarneqarpoq, tassani aalajangerneqarluni inatsisartut inatsisaata atulersinneqarnerata peqatigisaanik timersorneq timigissarnerlu eqqarsaatigalugu kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaata nr. 10-p, 21. maj 2002-meersumi maleruagassat atorunnaarput. Imm. 3-mi nutaami peqqussut naapertorlugu maleruagassat aalajangersarneqarsimasut imaluunniit ingerlatiinnarneqartut atuutiinnassapput, taakku atorunnaarsinneqarnissaasa imaluunniit inatsisartut inatsisaat manna imaluunniit inatsisit allat naapertorlugit maleruagassanik aalajangersarneqartunik taarserneqarnissaasa tungaannut. § 36, imm. 1-imi oqaaseqatigiit aappaanni piginnaatitsinermut aalajangersakkanut tunngassuteqartut siusinnerusukkut atortuulersitat pisariaaruttut atorunnaarsinneqarput

Tusarniaanermi akissutit taakkunungalu oqaaseqaatit tassunga tunngassuteqartut Ilanngussaq 1-itut tusarniaanermi akissutit pillugit ilisimatitsissutitut innersuussutigineqarput.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Aalajangersakkap siunertaa pillugu nassuiaatinut nalinginnaasunut innersuussisoqarpoq.

§ 2-mut

Imm. 1-imut

Atuuffiusoq tunngavilersorniarlugu annertunerusumillu paasisaqarfiginiarlugu tassani taaguutit ilaasut nassuiarneqarput. Taamaalilluni tamanna ukununga atuulluni: ”timersorneq”, ”timigissarneq” aamma ”unammilluni timersorneq”. ”Peqqissarneq” ”timersorneq”-p nassuiarneranut ilaamat taaguut taanna aamma nassuiarneqarpoq. ”Timigissarneq” takuneqarsinnaasutut ”timersorneq”-imut ilaatinneqarpoq. ”Timersorneq” aamma ”timigissarneq” taaguuserneqareernerisigut takuneqarsinnaavoq pineqartut tamarmik timip aalatinnissanut attuumassuteqarput. Tamatuma kingunerisaanik inatsisip atuuffiani timi atorlugu sammisaqarnermut ilaanngitsut timersornerit tamarmik ilaanngillat. Taakku nalinginnaasumik taaneqartarput ”eqqarsaasorsorluni timersorneq” tassaniillutillu assersuutigalugu skak aamma backgammon.

Imm. 2-mut

Nassuiarneqarnera marlunnik immikkoortortaqarpoq, tassalu timip aalatinnissaa pineqarmat aamma taakku aalajangersareersimasaniq imaqarneri. Taakku tassaapput kaloriat timimi uunneqartarneri imaluunniit inuit ataasiakkaat timikkut atugarissaarnerit peqqinnerallu nukittorsarniarlugu timi atorlugu sammisaqarnerit. Kaloriat timimi uunneqartarneri tassaavoq nerisat aqutugalugit timip nukittortarnera.

Imm. 3-mut

Nassuiarneqarnera marlunnik imaqarpoq tassalu sunngiffimmi sammisassaqaarnissaq pineqarmat aammalu aalajangersimasumik siunertaqarluni tamakku ingerlanneqartarmata.

Sunngiffimmi sammisassaqaartitsineritut tunngatillugu tamanna isumaqarpoq napparsimareernerup kingunerisaanik sungiusaqqilerneq peqqinnissaqarfimmit piumasaaqatit naapertorlugit pisimappat tamanna ilaatinneqaanngimmat.

Imm. 4-mut

Nassuiarneqarnera marlunnik immikkoortortaqarpoq tassalu timersorneq maleruagassat aalajangersarneqarsimasut naapertorlugit pisarmat ilutigalugulu taasuma unamminermut ilaatillugu ingerlanneqartarnera. Uaniami pineqarpoq timersorneq maleruagassiornikkut aqqissorneqarsimasoq aammalu inuit marluk arlallilluunniit akornanni unamminertalik.

§ 3-mut

Til stk. 1

Imm. 1-imut

Aalajangersagaq aqutugalugu aqqissuussamik timersortartut timigissartartullu timigissartarfimmik ernumananngitsumik isumannaatsumillu toqqammaveqarluni ingerlanneqarnera isumaginissaanik peqquneqarput.

Oqaasertaliussami ”isumagissuaat” isumaqarpoq pisinnaasamikkut pisussaaffiup malinneqarnissaanut iliuseqarnissamut pisussaaffeqartut.

Imm. 2-mut

Aalajangersakkami ilaatigut imm. 1-imi taaneqartunit kattuffinnit il.il. pisussaaffilerneqartunit iliussissatut suut naatsorsuutigineqarnersut allatorneqarput, timersorneq timigissarnerlu ernumananngitsumik isumannaatsumillu toqqammaveqarluni ingerlanneqassasut. Tassani siullermik pineqarpoq meeqqanik pinerliisimanngininnermut uppersaatinik piunasaqaateqartussaataaneq pillugu Inatsisartut inatsisaat nr. 8, 19. maj 2010-meersumut, Inatsisartut inatsisaatigut nr. 7, 3. juni 2015-imeersukkut allanngortinneqartumut naleqqiullugu meeqqanik pinerliisimanngininnermik uppersaammik piunasaqaateqartussaataaneq pillugu maleruagassat pillugu paasissutissiinissamut aamma malinninnissamut pisussaaffik. Meeqqanik pinerliisimanngininnermik inatsimmi maleruagassanik malinninneq taamaalilluni meeqqat inuusuttullu ernumananngitsumik timersornermik timigissarnermillu ingerlataqarnissaannik qulakkeereqataavoq. Aappaatut pissuseq isumannaallisaanermut tunngasoq pineqarpoq. Tassani pineqarpoq atortut naammaginaruunerat aamma atortunik periutsinillu isumannaatsumik atuineq. Atortut assersuutigalugu tassaasinnaapput timersortarfiit inillu timersortup imaluunniit timigissartup timersorfigisai.

Atortunik isumannaatsunik atuinissaq pillugu piunasaqaammik tunngavigineqarpoq atortut atorneqartut naammaginarumik pitsaassuseqarnissaat, immikkoortumi malitassanik naammassinnillutik, aamma atortut amigaatillit, ajoquserneqarsimasut allatigulluunniit taakku atorneqarnerisigut ajoqusiinnaasut atorneqassanngitsut.

Periutsit isumannaatsut atorneqarnissaat pillugu piunasaqaammik tunngavigineqarpoq periutsinik misiligarneqarsimannngitsunik aamma atorneqarsinnaasutut akuerisaanngitsunik imaluunniit periutsinik aarlerinartulinnik atuisoqannginnissaa. Piunasaqaatini marluusuni aammattaq tunngavigineqarpoq timersortut timigissartullu atortut periutsillu atorneqarnissaannut iluameersumik ilitsersuunneqarnissaat.

Aammattaq aalajangersarneqarpoq kattuffiit, peqatigiiffiit il.il. pisussaaffilerneqarsimasut katsorsartinnissaq sungiusarteqqinnissarlu siunertaralugu timersortartunut timigissartartunullu ajoqusersimasunut pisariaqartutigut ikiuinissaat tapersersuinissaallu aamma qulakkeerneqassasoq. Kattuffiit peqatigiiffiillu il.il. ataasiakkaat taamaattumik tamanna pillugu politikkeqassapput, tassunga ilanngullugit ajoqusernerit ataasiakkaat qanoq ingerlaannartumik katsorsarneqarsinnaanersut, peqqinnissaqarfik qaqugu aggersarneqartariaqarnerisigut imaluunniit allatigut ilanngutitinneqassanersigut aamma kattuffik,

peqatigiiffik il.il. pineqartoq sungiusarteqqinnermut qanoq ikiuunnissaanut isummertoqartariaqarluni. Aalajangersagarli kattuffinnut, peqatigiiffinnut il.il. nammineq katsorsaansamut sungiusarteqqinnissamullu isumaginnittuunissaannut pisussaaffiliinngilaq, tassa suliassaq taanna peqqinnissaqarfiup pisussaaffigimmagu.

Aalajangersakkat aallartinnerani oqaasertaliussami "ilaatigut" siunnerfigineqarpoq imm. 2-mi allattuinerit tamakkiisuunnigitsut. Aalajangersakkami pisussaaffilerneqartut kattuffiit il.il. taamaalillutik nalinginnaasumik timersornerup timigissarnerullu ernumananngitsumik toqqammaveqartumik pinissaat isumagisussaavaat.

Imm. 3-mut

Piginnaatitsinnermut aalajangersagaq assersuutigalugu imm. 2-mi taaneqartut periutsit allaanerusut pillugit maleruagassanik aalajangersaanermi atorneqassasoq eqqarsaatigineqarpoq, taamaalilluni timersornermut timigissarnermullu toqqammaviit ernumananngitsut isumannaatsullu qulakkeerneqarsinnaallutik. Taanna aamma kattuffiit, peqatigiiffiit il.il. ataasiakkaat qanoq piviusumik imm. 2-mi taaneqartunik pisussaaffinnik malinninnissaannik qulakkeerinninnissaq pillugu maleruagassanik aalajangersaanermut atorneqarnissaat eqqarsaatigineqarpoq.

§ 4-mut

Aalajangersakkap kattuffiit, peqatigiiffiit il. il. taaneqartut timersornerup timigissarnerullu atortussiat inerteqqutaasut atornagit aamma periutsit inerteqqutaasut atornagit ingerlannissaa aamma nakorsaatinik pissassaatinut atorneqartartunik atuinnginnissaq pillugu maleruagassanik Nakorsaatinik Pissassaatinut Atorneqartarnerinut Kalaallit Nunaanni Akiuisunit aalajangersarneqartunik malinninnissaannik atortinnissaannillu isumaginninnissaannik piumasqaateqarpoq.

Aalajangersagaq siulliuvoq pilersinneqarlunilu timersornerni ataqpeqatigiilluni ammasumik unneqqarissumillu ingerlatsisarnissaq kissaatigineqarmat. Timersornerni ataasiakkaani maleruagassanik malitaqarluni timersorluni unamminerit tamarmik ingerlanneqartarnissaat siunertaavoq. Tassani aamma unammisaminnut naleqqiullutik imminerminnut iluaquserlutik periutsinik akuerisaanngitsunik imaluunniit atortussianik akuerisaanngitsunik peqataasut iisaqannginnissaat ilaavoq. Peqqusersuinneq taamaalilluni nakorsaatinik pissassaatinut atorneqartarnerinik akiuinnermut tunngatillugu pingaaruteqarluinnarpoq.

Ataqqinninneq ilaatigut isumaqarpoq unammisat nalitut akuerineri aamma taamatut iliuuseqarfigineri. Peqquserlunnerit/sianiinaarinerit tamarmik unammisamik ataqqinninnginnermik takutitsinerupput.

Aalajangersagaliormut timersortartut timigissartartullu ataasiakkaat toqqissisimanissaat ilaatigut tunngavigineqarpoq. Atortussianik inerteqqutaasunik periutsinillu inerteqqutaasunik

atuineq timersortartumut timigissartartumullu peqqissutsikkut ajoquteqalernermik taamaasilluni kinguneqarsinnaavoq.

Taaguutip ”isumagissuaat”-ip paasineqarnissaanut § 3-mut nassuiaatinut innersuussisoqarpoq. Atortussiat inerteqqutaasut tassaapput atortussiat nakorsaaitit pissassaaitit atorneqartartut ilaasa inerteqqutaanerat pillugu Inatsisartut peqqussutaat nr. 7, 31. maj 2001-imeersumi taaneqartut, peqqussummi § 2-mi Naalakkersuisut tunngaveqarlutik tamanna pillugu nalunaaruteqarnikkut aamma aalajangersimasut peqqussummut ilaassasut. Atortussiat inerteqqutaasut aamma tassaapput ikiaroonartut inatsisinut akerliusut ikiaroonartut pillugit inatsisip Kalaallit Nunaannut atulersinneqartumut ilaasut. Atortussiat inerteqqutaasut periutsillu inerteqqutaasut aamma tassaasinnaapput atortussiat periutsillu Nakorsaaitit Pissassaaitit Atorneqartarnerinut Kalaallit Nunaanni Akiuisut maleruagassat aalajangersagaani taaneqarsimasut, tamanna aalajangersakkat immikkoortuata naggataani aalajangersarniarneqarluni. Kisianni Nakorsaaitit Pissassaaitit Atorneqartarnerinut Kalaallit Nunaanni Akiuisut aalajangersarneqartut nakorsaaitit pissassaaitit atorneqartarneri pillugit maleruagassanut aamma pissutsit allat ilaasinnaapput.

Taamaaqataanik peqqusersuineq timersorluni unamminerit allanngortiterinerinik akiuiniarnermut naleqqiullugu pingaaruteqarluinnarpoq. Peqqusersuineq aamma naapertuilluartumik unamminermik takutitsinerup pingaaruteqarneranut attuumassuteqarpoq, assersuutigalugu timersorluni unamminermi ileqqussaannngitsumik imminut imaluunniit iligisanut iluaqutaasumik dommerip aalajangiinissaanut allanngortiteriniarneq.

§ 5-imut

Imm. 1-imut

Aalajangersakkami timersornermi kattuffiit, timersoqatigiiffiit aamma timersortartut klubbiisa timersortut aamma timersortunut ikorfartuisut timersorluni unamminernik allanngortiteriniarnerni peqataannnginnissaasa isumaginissaanut pisussaaffilerneqarput.

Aalajangersagaliornermut timersornermi tunngaviusut pingaarnerit tassalu peqqusersuinissamik ataqpeqatigiittarnissamillu tunngaveqarluni ingerlatsisarnissap malinneqarnissaa tunngavigineqarpoq. Tassunga tunngatillugu inatsisissatut siunnersuummi § 4-mi allassimasut innersuussutigineqarput. Taaguutip ”isumagissuaat”-ip paasineqarnissaanut § 3-mut nassuiaatinut innersuussisoqarpoq.

Aalajangersakkami kattuffiit il. il. pisussaaffilerneqartut §§ 3 aamma 4-imi ilaasunut naleqqiullugit taamaallaat timersornermi kattuffinnut, timersoqatigiiffinnut timersortartullu klubbiinut killeqartinneqarput taamaalillutillu tasaanatik timigissarfiit allallu suliffeqarfiit timersornermik timigissarnermilluunniit sammisaqarnissamut imaluunniit taakkununga eqqaanartunik sammisanik neqerooruteqartartut. Tamatumunnga pissutaavoq timersorluni unamminernik allanngortiterinermut tunngatillugu ajornartorsiutit aqqissugaasumik timersornerup iluani timersorluni unamminernut attuumassuteqartutut isigineqarnerat.

Timersortartumut ikorfartuisutut paasineqarpoq ilitersuisoq, sungiusaasoq, aqutsisoq, sinnisoq, suleqataasoq, dommeriusartooq, nakorsaannermik ilinniagaqarsimasooq inmaluunniit nakorsaannermik ilinniarsimasuunani ikiuuttartooq timersorluni unamminermi peqataasumik tassunga piareersartumik timersortartooq peqatigalugu suliaqartooq imaluunniit katsorsaasoq. Timersorluni unamminernik allanngortiterinermi paasineqarput piaaraluni iliuuserisat timersorluni unamminerup naleqqutinngitsumik allanngortinneranik imaluunniit ingerlaneranik imaluunniit inerneranik sunnerneranik kinguneqartooq imminermut allanulluunniit iluaqusernissaq iluanaaruteqarnissarlunniit anguniarlugu aamma timersorluni unamminerup ingerlaneranut inerneranullu nalinginnaasumik atasut nalornissutsit tamarmiusunik ilaannaanilluunniit peersinerit. Tamanna assersuutigalugu tassaasinnaavoq timersornerlu unamminerup inerneranik piaaraluni allanngortiterineq, piaaraluni naammangitsumik naammassisaqarneq, timersorluni unamminermi imaluunniit taassuma immikkoortuini ataasiakkaani piaaraluni ajorsarneq aamma timersorluni unamminerup aalajangersimasumik sammiveqalernissaanut inummik allamik sunniinarluni akiliilluni peqquserlunneq imaluunniit siorasaarineq.

Akiliilluni peqquserlunneq pillugu § 6-mut innersuussisoqarpoq, nunami maani imaluunniit nunani allani qaffasissumik timersorluni unamminermut atatillugu akiliilluni peqquserlunneq pillugu maleruagassanik aalajangersaasoq.

Imm. 2-mut

Piginnaatitsinermik aalajangersagaq ilaatigut timersorluni unamminernik allanngortiterinernik pitsaaliuinerneq aamma akiuiniarnerneq ataqatigiissarinernullu toqqammavimmut allattoqarfiup inissinneqarnissaa pillugu maleruagassanik aalajangersaanissamut atornerqarsinnaassaaq. Tamatuma erseqqissarneqarneqanun pisutaavoq timersorluni unamminernik allanngortiterinernik akiuiniarneq pillugu Europarådip isumaqatigiissutaanik malinninnissamut piumasarineqarmat taamatut ittumik toqqammavissamik pilersitsinissaq.

§ 6-imut

Imm. 1-imut

Aalajangersakkami siunertarineqarpoq timersornerup iluani akiliilluni ingasattumik peqquserluttulionerit pinerluuteqarsimasutut isigineqalernissaat.

Timersornerup silarsuaani akiliilluni peqquserlunnermi peqataaneq takunninnerlu aallaaviatigut pineqaatissiissutaassanngilaq, tamanna peqquserlunnermut atatillugu pinngippat. Aalajangersakkami siunertarineqarpoq timersornerup iluani akiliilluni ingasattumik peqquserlunnerit pineqaatissiissutaalersinnissaat, peqquserluttoqarnera pinersooq apequtaatinnagu.

Ingasannerusumik peqquserluttoqarneranik naliliiniarnermi aalajangersakkami pingaartinneqarpoq unamminermi pineqartumi timersornerup qaffasissusia, taamaalilluni timersorluni unamminerit qaffasinnerpaat taamaallaat ilaatinneqarlutik. Tassani siunertaq

tassatuaavoq timersornerup innarlerneqannginnissaata ajoquserneqarsinnaaneranut immikkut atassuteqartut pinerluttuliorluni iliuuseqarnerit.

Timersorluni unamminernut qaffasissut qanoq paasineqassanersut aalajangersakkatigut aalajangersarneqarput. Qaffasissut tassaapput nuna tamakkerlugu unamminerit, Kalaallit Nunaanni pissartanngorniunnerit, nunani tamalaani pissartanngorniunnerit aamma timersortartut pikkorivissut nunani tamalaani unammiaaernerat.

Aalajangersakkap atorneqarnissaanut assersuut tassaavoq unammisartut marluk akornanni unamminermut atatillugu unammisut aappaanni inummut ataatsimut arlalinnulluunniit akiliilluni peqquserlutsitsineq, unamminerup inernera unammeqataasut aappaata appariarnissaanut imaluunniit qaffariarnissaanut imaluunniit unamminermi ingerlaqqinnissamut pingaaruteqarluni, tamanna unammisut aappaannut pingaaruteqanngikkaluarluni, aamma qaffariarneq imaluunniit appariarnerup pinngitsoortinneqarnera imaluunniit unammisunut aalajangersimasunut unamminermi ingerlaqqinneq aningaasaliisunit annertunerusumik isertitaqarnissamik, pitsaanerusunik tapiiffigineqarnissamik assigisaanilluunniit kinguneqarsinnaalluni taamaalillunilu unammisumut pineqartumut aningaasatigut pilerinartuulluni.

Oqaatigineqassaaq aalajangersakkamut ilaammata akiliilluni peqquserlutsitsisoq aamma peqquserlunnermi akilerneqartoq.

Imm. 2-mut

Akiliilluni peqquserlunnermut pineqaatissiissutaasinnaasunut piunasaqaatit allaaserineqarnerani erseqqissarneqarpoq piaaraluni imaluunniit tunngavissaqanngitsumik akiliilluni peqquserlutsitsisimanissaq imaluunniit peqquserluuteqarnissamut akilerneqarsimanissaq. Tassalu aalajangersimasumik siunertaqarluni piaaraluni iliuuseqarsimasutut igineqarsinnaalluni.

Aappassaatut iliuuserineqarsimasut tunngaveqanngitsutut pineqarnerat erseqqissaatigineqarpoq. Akilerneqarneq imaluunniit tunissutisiassanik tigusaqarneq maleruagassat aalajangersarneqarsimasut naapertorlugit pisimasut taamaasillutik ilaatinneqassanngillat.

§ 7-imut

Aalajangersakkami siunertaq tassaavoq timersornerup timigissarnerullu inuiaqatigiinni immikkoortuni tamani ilanngussimanissaata qulakkeerneqarnissaa, tassunga ilanngullugit immikkoortut aalajangersakkami taaneqartut.

Oqaasertaliussami ”inuiaqatigiinni immikkoortuni tamani timersornerup timigissarnerullu tapersorneqarnera qulakkiissavaat” siunniunneqarpoq kallerriutigineqassasoq pisortani oqartussat timersornermi kattuffiit suleqatigalugit tamatuminnaga alaatsinaannissaat tamannalu malinniarneqassasoq ingerlataqarfinni politikkit oqaasertalersornerisigut aamma aalajangersimasut suliniutit pingaarnersiornerisigut.

§ 8-mut

Imm. 1-imut

Aalajangersakkap siunertaa tassaavoq timersornerup timigissarnerullu nunami tamarmi kikkunnit tamanut ammasuunissaata qulakkeerneqarnissaa, tassunga ilanngullugit immikkut pisariaqartitsisunut siunnerfeqartumik suliniutit tapersornerisigut aamma peqataanissamut aningaasaqarnikkut aporfiusut annikillisinneqarnissaannut suliniuteqarnikkut.

Tamanut ammasuunerani siullermik pineqarpoq kikkunnut tamanut neqerooruteqarnissaq, sumi najugaarneq apeqqutaatinnagu, aamma pisinnaanikkut aporfeqarsinnaaneq apeqqutaatinnagu. Tulliatut tamanut ammasuunerani pineqarpoq aningaasaqarnikkut tamatumunnga aporfeqarnerup kingunerisaanik neqeroorutit iluaqutiginnissaannut aporfeqannginnissaq. Aalajangersakkalli kikkut tamarmik assigiimmik neqeroorfigineqarnissaannut pisussaaffiliinngilaq, sumi najugaarneq apeqqutaatinnagu, aamma inuttut pisinnaaneq apeqqutaatinnagu.

”Immikkut pisariaqartitsisuni” ilaatigut eqqarsaatigineqarput inuit pisinnaanermikkut akornuteqartut. Kisianni aamma inuit allaasinnaapput immikkut pisariaqartitsisut, assersuutigalugu aalajangersimasunik ukioqartuusinnaapput imaluunniit assigiinngitsutigut avissaartinneqarsimasutut ajatugaasut.

”Peqataanissamut aningaasaqarnikkut aporfiusut annikillisinneqarnissaannut suliniuteqarnikkut” assersuutigalugu tassaasinnaapput immikkut ittumik tapiissuteqartarnerit, timersornermi kattuffinnut tapiissuteqarnikkut Naalakkersuisunit imaluunniit kommunalbestyrelsimi toqqaannartumik akiliutigineqartut imaluunniit aqunneqartut. Aamma tassaasinnaapput angajoqqaanit aningaasaqarnikkut pissakitsuniit meeqqanut inuusuttunullu akeqanngitsumik inissaqartitsinermik aaqqissuussinerit. Tamanna sungiusarnermut timersornikkullu unammiaarnernut naleqqiullugu atuuppoq.

Imm. 2-mut

Aalajangersakkami aalajangersarneqarpoq aalajangersakkami allattorneqartuni immikkut isiginnittoqarlunilu salliutitsisoqassasoq.

Meeqqat inuusuttullu immikkut isiginiarneqartussatut ilanngunneqarput, tassa meeqqat inuusuttullu peqqissuunerannut, ingerlalluarnerannut ilikkagaqarnissaannullu pingaarimat aalanissaat.

Utoqqaat immikkut isiginiarneqartussatut ilanngunneqarput, tassa utoqqarnut timersorneq timigissarnerlu taakku peqqinnissakkut inissisimanerannut pingaaruteqarmat, peqatigisaanillu timersornerup ingerlanneqarnerata kingunerisaanik ataatsimoorneq katerisimaarnerlu nuannaartitsinermik taakkununnga misigisaqartitsisinnaammat.

Inuit pisinnaanermikkut akornuteqartut immikkut isiginiarneqartussatut ilanngunneqarput, tassa inuiaqatigiit inunnut neqeroorutininik nalinginnaasunik imaaliiallaannaq atuisinnaanngitsunut aamma neqerooruteqarnissamut qulakkeerinninnissamut immikkut pisussaaffeqarmata.

Immikkut atugarliortut tassaasinnaapput inussuttut atornerluinermik ajornartorsiuteqalersimasut, pinerluuteqarsimasut allatigulluunniit inuttut immikkut ajornartorsiuteqalersimasut.

”Immikkut isiginiarneqarlutillu salliutinneqassapput”-mi kalerriutiginiarneqarpoq pisortani oqartussat timersornermi kattuffiit suleqatigalugit timersornermi politikkiminni aamma taakku piviusunngortinneranni taamatut inatsisitigut pisussaaffik arajutsinaveersaassagaat malinniassagaallu.

Imm. 3-mut

Piginnaatitsinermut aalajangersagaq assersuutigalugu immikkut tapiissuteqarnikkut aaqqissuussinerit pillugit maleruagassanik aalajangersaanermi atornerqartassasoq eqqarsaatigineqarpoq.

§ 9-mut

Imm. 1-imut

Oqaasertaliussami ”kajumissaaralutillu toqqammavinnut pitsaasunik pilersitsillutillu tapersersuissapput” kalerriunniarneqarpoq pisortani oqartussat timersornermi kattuffiit suleqatigalugit timersornermut timigissarnermullu tunngasut iluanni kajumissuseqarluni suliaqarnej pillugu assigiinngitsutigut tapersersuissasut.

Kajumissaarinermi pineqarpoq kajumissuseqarluni ikiortaanissamut kajumissaarineq kaammattuinerlu.

Tapersersuineq tassaavoq assigiinngitsutigut aningaasatigut tapersersuineq. Tamanna assersuutigalugu pisinnaavoq kajumissuseqartunut pikkorissartitsinissaq pillugu neqerooruteqarnej.

Oqaasertaliussami ”kajumissuseqarluni suliaqarnermut ... toqqammavinnut pitsaasunik pilersitsineq” eqqarsaatigineqarpoq kajumissuseqartut suliaqarnissamut tunngavinnik oqilisaasunik pissutsinik pilersitsineq, kajumissuseqarluni suliaqarnermut aporfiusinnaasunik nungusaasut. Tamanna assersuutigalugu tassaasinnaavoq piffissap suliffiusup eqaatsumik aaqqissuunneqarnera, tassunga ilanngullugu timersornikkut timigissarnikkullu aaqqissuussinerne anginerusuni kajumissuseqarluni peqataanermut atatillugu sulinnigiffeqarnej.

Imm. 2-mut

Piginnaatitsinermi aalajangersagaq aalajangersakkami taaneqartutut ilaatigut kajumissuseqartut pillugit nalunaarsuiffimmik pilersitsineq pillugu maleruagassanik aalajangersaanermut atorneqarsinnaavoq. Taamatut nalunaarsuiffik timersornermi kattuffinnut, timersoqatigiiffinnut il.il. aaqjissuussinernut assigiinngitsunut imaluunniit ilitersuisussanik, sungiusaasussanik, ikiortissanik assigisaanillu kajumissuseqartunik pissarsiniarnermut atatillugu annertuumik iluaqutaasinnaavoq.

§ 10-mut

Imm. 1-imut

Aalajangersakkami aalajangerneqarpoq timersornikkut timigissarnikkullu neqeroorutit assigiinngisitaartut innuttaasunit tamanit atorneqarsinnaanerinut, neqeroorutigineqarsinnaanerinut ingerlanneqarsinnaanerinullu Naalakkersuisut pingaarnertigut akisussaasut. Tamanna §§ 7 aamma 8-mi aalajangersakkanut atatillugu isigineqassaaq.

”Timersornikkut timigissarnikkullu neqeroorutit assigiinngisitaartut” paasineqassaaq neqeroorutit assigiinngitsut arlaliussasut taakkulu assigiinngisitaartuussasut. Tamatuma nuna tamakkerlugu atuunnissaata qulakkeerneqarnissaanut Naalakkersuisut pisussaaffeqartut, kisiannili nunami sumiiffinni tamani taamaannissaa ilanngunnagu. Pissarsiarineri, neqerooruteqarneq tamanullu ammasuunera Naalakkersuisut nammineq aaqqiinerisigut imaluunniit timersornermi kattuffinnut tapiissuteqarnikkut toqqaannartumik tamanna pisinnaavoq.

Imm. 2-mut

Aalajangersakkami aalajangerneqarpoq timersornerup timigissarnerullu ernumananngitsuunera isumannaatsuuneralu pillugit maleruagassat, aamma timersornerup timigissarnerullu minguitsuuneri pillugit maleruagassat eqqortinneqarnissaat pillugu Naalakkersuisut aamma akisussaasut.

§ 3-mi aamma §§ 4 – 5-imi maleruagassanut aalajangersarneqartunut timersornerup timigissarnerullu ernumananngitsuunera isumannaatsuuneralu pillugit aalajangersakkanut innersuussisoqarpoq.

Naalakkersuisut akisussaaffiat Kalaallit Nunaanni Timersoqatigiit Kattuffiannut aamma Elite Sport Greenlandimut tapiissutit aamma taakku nakorsaaitit pissassaaitit atorneqartarnerinik aamma timersorluni unamminerni allanngortiterinernik pitsaaliuinerinik akiuilluni suliaqarnerisa akornannut atatillugu §§ 3-5 aamma § 13-mi timersornermi kattuffinnut, timersoqatigiiffinnut il. il. pisussaaffiusunut atatillugu isigineqassaaq.

§ 11-mut

Imm. 1-imut

Aalajangersakkami Kalaallit Nunaanni Timersoqatigiit Kattuffiannut aningaasanut inatsimmi ukiumoortumik aningaasaliissuteqarnissamut Naalakkersuisunut pisussaaffimmik aalajangersaasoqarpoq.

Tamanna periutsip maleruagassatut allanneqarsimanngitsup inatsisitigut allanneqalerneranut oqaasertaliineruvoq aamma Kalaallit Nunaanni Timersoqatigiit Kattuffianut inatsisitigut arlalinnik suliassaqartitsinermut takussutaalluni, tassunga ilanngullugit §§ 3-5-mi, §§ 7-9-mi, § 19-mi aamma § 22, imm. 5-imi. Taakkununga ilanngutissapput § 11, imm. 2-mi aalajangersarneqarmat tapiissutit sumut atorneqassanersut, aamma § 11, imm. 4-mi aalajangersarneqarluni Naalakkersuisut aamma Kalaallit Nunaanni Timersoqatigiit Kattuffiata akornanni angusassatigut isumaqatigiissummi ingerlatanut suut naatsorsuutigineqarnersut aalajangersarneqassasoq, tassunga ilanngullugit angusassatut piumasaqaatit.

Imm. 2-mut

Aalajangersakkami aalajangersarneqarpoq tapiissutit siunertat erseqqinnerusumik allatorneqarsimasut arlallit ingerlanneqarnerinut tunngaviusumik tapiissutigineqassasut. Tamanna maannakkut aningaasaliinissamut tunngaviusunik, aningaasanut inatsimmit takuneqarsinnaasunik maleruagassanik allanneqarsimanngitsunik inatsisitigut allanneruvoq.

Imm. 3-mut

Aalajangersakkami aningaasaliissutit ilai immikkut siunertanut atorneqartussanngortinneqarnissaannut nutaamik periarfissiinermut tunngavissiisoqarpoq. Tamanna assersuutigalugu nakorsaaitit pissassaaitut atorneqartarnerisa aamma timersorluni unamminerit allannngortiterneqartarnerisa pitsaaliorglugit akiorlugillu sulinerusinnaavoq imaluunniit § 8, imm. 2-mi taaneqartut inuit isiginiarneqarneri salliutinneqarnerilu.

Imm. 4-mut

Aalajangersagaq piumasaqaatit erseqqinnerusumik aalajangersarneqarsimasut piumasaralugit tapiissuteqarnissamut periarfissiinermut tunngavissiivoq. Tassani pineqarpoq § 13, imm. 1-imi inatsisitigut aalajangersarneqartunit aamma § 13, imm. 2-mi immikkut tunngavissiisunit piumasaqaatinut ilassutaasinnaasut. Assersuutigalugu piffissami tapiiffiusumi immikkut unammiuaarnernut pineqartunut immikkut naatsorsuusiornissamut piumasaqaataasinnaapput. Piumasaqaatinik aalajangersaaneq aamma Naalakkersuisut aamma Kalaallit Nunaanni Timersoqatigiit Kattuffiata akornanni angusassanik isumaqatigiisutaannut atatillugu aamma isigineqassaaq.

Imm. 5-imut

Angusassatigut isumaqatigiisummik isumaqatigiissusiortoqarnissaa tamatuma inatsimmi allanneqarnera nutaajuvoq. Manna tikillugu tamanna Kalaallit Nunaanni Timersoqatigiit

Kattuffiannut aningaasanut inatsisikkut aningaasaliissutitut missingersuutini ilanngussani aningaasaliinissamut tunngavissatut taamaallaat allanneqartarsimavoq.

Aamma nutaajuvoq angusassatigut isumaqatigiissut piffissamut ukiunut sisamanut atuutissasoq manna tikillugu ukiumut ataatsimut taamaallaat atuuttarsimalluni. Siunertaq tassaavoq piffissami ukiut arlallit ingerlaneranni piviusunnngortinneqarsinnaasunut sammisanut naatsorsuutigisat angusassatullu piumasaqaatit aalajangersarneqarsinnaaneri.

Isumaqatigiissut maanna atugassarititaasunut, tassunga ilanngullugu aningaasaliissutitut nutaanut pisariaqartitanullu nutaanut tunngatillugu ukiumoortumik aaqqiiffigineqartassaaq. Assersuutigalugu sullitat aalajangersimasut, soorlu inuit timimikkut akornutillit, immikkut salliutinneqarnissaannik Naalakkersuisut ukiumi pineqartumi kissaateqarsimappata.

Til § 12

Imm. 1-imut

Aalajangersakkami Elite Sport Greenlandimut aningaasanut inatsimmi ukiumoortumik aningaasaliissutitut Naalakkersuisunut aningaasaliinissamut pisussaaffimmik aalajangersaasoqarpoq.

Tamanna periutsip maleruagassatut allanneqarsimanngitsup inatsisitigut allanneqalerneranut oqaasertaliineruvoq aamma Elite Sport Greenlandimut inatsisitigut arlalinnik suliassaqartitsinermit takussutaalluni, tassunga ilanngullugit §§ 3-5-imi, §§ 7-9-mi aamma § 20-mi. Taakkununga ilanngutissapput § 12, imm. 2-mi aalajangersarneqarmat tapiissutit sumut atorneqassanersut, aamma § 12, imm. 5-imi aalajangersarneqarluni Naalakkersuisut aamma Elite Sport Greenlandip akornanni angusassatigut isumaqatigiissummi ingerlatanut suut naatsorsuutigineqarnersut aalajangersarneqassasoq, tassunga ilanngullugu angusassatut piumasaqaatit.

Imm. 2-mut

Aalajangersakkami aalajangersarneqarpoq tapiissutit siunertat erseqqinnerusumik allatorneqarsimasut arlallit ingerlanneqarnerinut tunngaviusumik tapiissutigineqassasut. Tamanna maannakkut aningaasaliinissamut tunngaviusunik, aningaasanut inatsimmit takuneqarsinnaasunik maleruagassanik allanneqarsimanngitsunik inatsisitigut allanneruvoq.

Imm. 3-mut

Aalajangersakkami aningaasaliissutit ilai immikkut siunertanut atorneqartussannngortinneqarnissaannut nutaamik periarfissiinermit tunngavissiisoqarpoq. Tamanna assersuutigalugu nakorsaatit pissassaatitut atorneqartarnerisa aamma timersorluni unamminerit allannngortiterneqartarnerisa pitsaaliorglugit akiorlugillu sulinerusinnaavoq imaluunniit timersortartunut pikkorivissunut timersornikkut aaqquissuussinernut anginerusunut aalajangersimasunut killeqartinneqartunut.

Imm. 4-mut

Aalajangersagaq piumasaqaatit erseqqinnerusumik aalajangersarneqarsimasut piumasaralugit tapiissuteqarnissamut periarfissiinermut tunngavissiivoq. Tassani pineqarpoq § 13, imm. 1-imi inatsisitigut aalajangersarneqartunit aamma § 13, imm. 2-mi immikkut tunngavissiisunit piumasaqaatinut ilassutaasinnaasut. Assersuutigalugu piffissami tapiiffiusumi immikkut unammuaarnernut pineqartunut immikkut naatsorsuusiornissamut piumasaqaataasinnaapput. Piumasaqaatinik aalajangersaaneq aamma Naalakkersuisut aamma Elite Sport Greenlandip akornanni angusassanik isumaqatigiissutaannut atatillugu aamma isigineqassaaq.

Imm. 5-imut

Angusassatigut isumaqatigiissummik isumaqatigiissusiortoqarnissaa tamatuma inatsimmi allanneqarnera nutaajuvoq. Manna tikillugu tamanna Elite Sport Greenlandimut aningaasanut inatsisikkut aningaasaliissutinut missingersuutini ilanngussani aningaasaliinissamut tunngavissatut taamaallaat allanneqartarsimavoq.

Aamma nutaajuvoq angusassatigut isumaqatigiissut piffissamut ukiunut sisamanut atuutissasoq manna tikillugu ukiumut ataatsimut taamaallaat atuuttarsimalluni. Siunertaq tassaavoq piffissami ukiut arlallit ingerlaneranni piviusunngortinneqarsinnaasunut sammisanut naatsorsuutigisat angusassatullu piumasaqaatit aalajangersarneqarsinnaaneri. Isumaqatigiissut maanna atugassarititaasunut, tassunga ilanngullugu aningaasaliissutinut nutaanut pisariaqartitanullu nutaanut tunngatillugu ukiumoortumik aaqqiiffigineqartassaaq. Assersuutigalugu nunani tamalaani unammersuarnernut peqataasussat salliutinneqarnissaannik Naalakkersuisut ukiumi pineqartumi kissaateqarsimappata.

§ 13-imut

Imm. 1-imut

Aalajangersakkami siunertarineqarpoq Kalaallit Nunaanni Timersoqatigiit Kattuffiannut aamma Elite Sport Greenlandimut tapiissuteqarluni aningaasaliissuteqarnikkut qulakkeerneqassasoq timersornermi kattuffiit taakku nakorsaait pissassaaitut atorineqarnerisa pitsaaliornissaat akiuinerlu pillugu Nakorsaait Pissassaaitut Atorneqartarnerinut Kalaallit Nunaanni Akiuisut maleruagassanik aalajangersagaanik malitsissasut eqqortitsissasullu. Aalajangersakkami oqaaseqatigiit aappaanni taamaalilluni erseqqissarneqarpoq maleruagassanik taakkuninnga peqqarniitsumik utikattumillu unioqqutitsineq tapiissutinik pissarsisinnaanerup atorunnaarsinneranik aamma tapiissutit tunniunneqareersimasut utertillugit akilerneqarnissaannik piumasaqarnermik kinguneqassaaq.

Imm. 2-mut

Aalajangersakkami siunertarineqarpoq Kalaallit Nunaanni Timersoqatigiit Kattuffiannut aamma Elite Sport Greenlandimut tapiissuteqarluni aningaasaliissuteqarnikkut qulakkeerneqassasoq timersornermi kattuffiit taakku timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut atortussasullu. Aalajangersakkami oqaaseqatigiit

aappaanni taamaalilluni erseqqissarneqarpoq maleruagassanik taakkuninnga peqqarniitsumik utikattumillu unioqqutitsineq tapiissutinik pissarsisinnaanerup atorunnaarsinneranik aamma tapiissutit tunniunneqareersimasut utertillugit akilerneqarnissaannik piumasaqarnermik kinguneqassaaq.

§ 14-imut

Imm. 1-imut

Aalajangersagaq kultureqarnermut sunngiffimilu sammisassaqtitsinermut peqqussummi § 34, imm. 2-mik ingerlatitseqqinneruvoq. Nalinginnaasumik taaguutit naapertorlugit ”sanaartornermut” taarsiullugu ”sanaartukkat” atorneqarput. Taamaalilluni piviusutigut allaanerusoqarnissaa siunertarineqanngilaq.

Imm. 2.

Nutaatut erseqqissarneqarpoq timersortarfinnut aqqissuussinernullu tapiissutit annerusumik nuna tamakkerlugu nunallu immikkoortuini timersortarfinnut atorneqartassasut. Tamanna illuatungaatigut isumaqarpoq iluarsaassinermut tapiissutit nuna tamakkerlugu, nunap immikkoortuini kiisalu sumiiffinni timersortarfinnik iluarsaassinernut atorneqartassasut. Nuna tamakkerlugu timersortarfinni paasineqarpoq timersortarfik innuttaasunit nunamit tamarmeersunit akuttunngitsumik atugassatut eqqarsaatigineqartut imaluunniit nunamut tamarmut atugassiaasut, assersuutigalugu nunap arsaattarfissua.

Nunap immikkoortuani timersortarfimmi paasineqarpoq timersortarfik nunap immikkoortuani innuttaasunit akuttunngitsumik atorneqartartussatut eqqarsaatigineqartoq, nunap immikkoortuani kommunit marluusinnaapput amerlanerullutilluunniit.

§ 15-imut

Imm. 1-imut

Aalajangersakkami aalajangersarneqarpoq kommunimi timersornermut timigissarnernullu assigiinngitsunik neqerooruteqarnermut kommunalbestyrelsi pingaarnertigut akisussaasoq tamatumunngalu anguniakkanik tunngavinnillu aalajangersaalluni.

Tamanna §§ 7 aamma 8-mi aalajangersakkanut atatillugu isigineqassaaq.

”Timersornikkut timigissarnikkullu neqeroorutit assigiinngisitaartut” paasineqassaaq neqeroorutit assigiinngitsut arlaliussasut taakkulu assigiinngisitaartuussasut. Tamatuma nuna tamakkerlugu atuunnissaata qulakkeerneqarnissaanut Naalakkersuisut pisussaaffeqartut, kisiannili nunami sumiiffinni tamani taamaannissaat pineqarnani.

Neqerooruteqarneq Naalakkersuisut nammineq aqqiinerisigut imaluunniit timersornermi kattuffinnut tapiissuteqarnikkut toqqaannartumik tamanna pisinnaavoq.

Anguniakkanik toqqammavinnillu aalajangersaanermi assersuutigalugu eqqarsaatigineqarpoq kommunalbestyrelsi immikkoortumik anguniakkanik erseqqissunik oqaasertalersuissasoq, assersuutigalugu sumiiffimmi timersorneq pillugu politikikkut aamma kommunimi tapiissuteqarnissamut maleruagassanik aalajangersaanikkut. Anguniakkanik toqqammavinnillu aalajangersaanissamut pisussaaffik kulturikkut sunngiffimillu sammisassaqtitsineq pillugu peqqussummi § 2, imm. 1-imik ingerlatitseqqinneruvoq.

Imm. 2-mut

Aalajangersagaq kultureqarnermut sunngiffimilu sammisassaqtitsinnermut peqqussummi § 2, imm. 2-mik ingerlatitseqqinneruvoq. Taamaattorli ”kulturikkut sunngiffimmi sammisassaqtitsineq” ”timersornikkut timigissarnikkullu neqeroorutinut” allanngortinneqarluni.

Naatsorsuutigineqarpoq timersornikkut timigissarnikkullu neqeroorutit pillugit ukiumoortumik pilersaarusiorneq timersornermi kattuffiit peqataatinnerisigut pisassasoq.

Nutaatut aalajangersarneqarpoq pilersaarutip kommunip nittartagaatigut tamanut saqqummiunneqartarnissaa. Taamaaliortoqarpoq qulakkeerniarlugu innuttaasut pilersaarummik sumi nassaarsinnaanerlutik ilisimaniassammassuk.

Imm. 3-mut

Aalajangersagaq nutaajuvoq. Aalajangersakkami kommunimi illoqarfinni nunaqarfinnilu timersornikkut timigissarnikkullu pillugit ukiumoortumik pilersaarutip ilusaa imarisaalu pillugit maleruagassanik aalajangersaanissamut Naalakkersuisut periarfissinneqarput. Erseqqissarneqarpoq maleruagassat tamanna pillugu kommunalbestyrelsit isumasioreernerisigut aalajangersarneqassasut. Tamatumani qulakkeerniarneqarpoq maleruagassanik aalajangersaaneq kommunit kissaataat pisariaqartitaallu pissusissamisoortumik eqqarsaatigalugu pissasoq.

§ 16-imut

Imm. 1-imut

Aalajangersagaq nutaajuvoq kisianni periutsimik maleruagassanik allanneqarsimanningsunik inatsisitigut allanneqarluni. Taamaalilluni aamma § 17-mi naatsorsuutigineqarluni, maleruagassanik atuuttunik ingerlatitseqqinnerusoq, kommunalbestyrelsit tapiissuteqartassasoq.

Imm. 2-mut

Aalajangersagaq nutaajuvoq aamma timersortarfinnik sanaartornermut, iluarsaassinnermut aqqissuussinnermullu kommunalbestyrelsip tapiissutai sumiiffinni timersortarfinnut tapiissutaanerusarnerannik erseqqissaalluni. Tamanna timersortarfit aassuussinerillu

eqqarsaatigalugit nuna tamakkerlugu aamma nunap immikkoortuini timersortarfinnut tapiissutaanerusunik Naalakkersuisut tapiissutaannut paarlattuutut isigineqassaaq.

Sumiiffinni timersortarfinni paasineqarpoq timersortarfiit kommunimi pineqartumi innuttaasunit akuttunngitsumik atorneqartartussatut eqqarsaatigineqartut.

Imm. 3-mut

Aalajangersagaq kultureqarnermut sunngiffimmilu sammisassaqaqtitsinermit peqqussummi § 33, imm. 2-mik ingerlatitseqqinneruvoq. Tamanna tapiissuteqartoqarnera pillugu aalajangersimasumik isumaqatigiissuteqarnermik taamaattoqartillugulu aningaasanik aalajangersimasunik tunngaveqarpoq.

Imm. 4-mut

Aalajangersagaq nutaajuvoq kisianni periutsimik maleruagassanik allanneqarsimanngitsunik inatsisitigut allanneqarluni.

Sumiiffinni timersornikkut timigissarnikkullu sammisassaqaqtitsinermit tapiissutit assersuutigalugu sumiiffimmi timersoqatigiiffimmut aamma timersornermi klubbimut tapiissuteqarnikkut pisinnaavoq. Tapiissutit aamma aqqissuussinernut aalajangersimasunut imaluunniit siunertanut aalajangersimasunut tapiissutaasinnaapput.

Imm. 5-imut

Aalajangersagaq nutaajuvoq. Aalajangersakkami kommunini tapiissutit pillugit maleruagassanik aalajangersaanissamut Naalakkersuisut periarfissinneqarput. Erseqqissarneqarpoq tamanna pillugu kommunalbestyrelsit isumasioreernerisigut maleruagassat aalajangersarneqassasut. Tassani siunertarineqarpoq kommunit kissaataat pisariaqartitaallu pissusissamisootumik eqqarsaatigalugu maleruagassamik aalajangersaasoqarnissaa qulakkeerneqassasoq.

§ 17-imut

Aalajangersagaq § 16-imi oqaasertat malitsigisaannik annikitsumik allannguuteqarluni kultureqarnermut sunngiffimmilu sammisassaqaqtitsinerit pillugit peqqussummi § 35-imit ingerlateqqitaavoq tassanilu aalajangersarneqarluni timersortarfiit sanaartornerinut, iluarsaannerinut aqqissuunnerinullu kommunalbestyrelsi allaluunniit tapiissuteqarpata imaluunniit ininik silamilu timersortarfiit, timersoqatigiiffinnit pigineqartut attartorneqartulluunniit ingerlannerinut aningaasartuutitut tapiissuteqarpata Naalakkersuisut tapiissutit ilaat utertillugit akilersinnaagaat.

§ 18-imut

Imm. 1-imut

Aalajangersagaq kultureqarnermut sunngiffimmilu sammisassaqaqtitsinerit pillugit peqqussummi §3 imm. 1-imit ingerlateqqitaapput aalajangersarneqarlunilu sumiiffinni kommunit aggornerisa avataanniittuni inatsit manna malillugu kommunalbestyrelsimut ulluinnarni suliaasarititaasut Naalakkersuisunit isumagineqarsinnaasut.

Imm. 2-mut

Aalajangersagaq kultureqarnermut sunngiffimmilu sammisassaqaqtitsinerit pillugit peqqussummi §3 imm. 2-mit ingerlateqqitaapput aalajangersarneqarlunilu Naalakkersuisut kommunimi ataatsimi arlalinniluunniit kommunalbestyrelsimik isumaqatigiissuteqarnermikkut, imm. 1 malillugu Naalakkersuisunit pisussaaffigineqartut, suliaasat taakku isumagineqarnissaat kommuninut tunniunneqarsinnaasut.

§ 19-imit

Aalajangersagaq nutaajuvoq kisianni periutsimik maleruagassanik allanneqarsimanngitsunik inatsisitigut allanneqarluni.

Kalaallit Nunaanni Timersoqatigiit Kattuffiat timersornermut timigissarnermullu ingerlataqarnermut aaqqissugaasumut Kalaallit Nunaata nunami pisortatigoortumillu sinniisuunera isumaqarpoq kattuffik immikkoortup taassuma iluani pisortatigut pissutsinut tamanut Kalaallit Nunaannut sinniisuusoq. Tamanna aalajangersakkami taaneqartutut assersuutigalugu pisortatigoortumik, nunani tamalaanut atatillugu pisinnaavoq.

Aalajangersagaq nutaajuvoq kisianni periutsimik maleruagassanik allanneqarsimanngitsunik inatsisitigut allanneqarluni.

§ 20-mut

Imm. 1-imit

Aalajangersagaq nutaajuvoq kisianni periutsimik maleruagassanik allanneqarsimanngitsunik inatsisitigut allanneqarluni.

Elite Sport Greenlandip timersortartut pikkorivissut tapersornerannut ineriartortinnerannullu Kalaallit Nunaanni aaqqissuusaanera isumaqarpoq suliffeqarfik immikkoortup taassuma iluani sutigut tamatigut pisortatigut Kalaallit Nunaannut sinniisuusoq. Tamannali pissaaq Kalaallit Nunaanni Timersoqatigiit Kattuffiat peqatigalugu pissaaq. Suliffeqarfiup aamma Kalaallit Nunaanni Timersoqatigiit Kattuffiata isumaqatigiissutigisinnaavaat pisumi aalajangersimasumi kattuffik imaluunniit suliffeqarfiup Kalaallit Nunaannut sinniisuussanersoq pillugu isumaqatigiissuteqarsinnaapput, imaluunniit marluullutik sinniisuusariaqarnerlutik.

Tamanna aalajangersakkami taaneqartutut assersuutigalugu pisortatigoortumik, nunani tamalaanut atatillugu pisinnaavoq. Tamanna tassaasinnaavoq timersornikkut aaqqissuussinerit aamma nuna tamakkerlugu timersoqatigiit kattuffiannit aaqqissuussinerit.

Imm. 2-mut

Aalajangersakkami Elite Sport Greenlandip siunertaminik qanoq tapersuissanersoq aalajangersarneqarpoq. Allattukkami tunngavigineqarpoq suliassatut allaaserisat Elite Sport Greenlandip malittarisassaani isumagineqarsimasut. Tassani aamma aalajangersarneqarpoq suliassanik isumaginninneq Kalaallit Nunaanni Timersoqatigiit Kattuffiat tassanilu immikkut kattuffiit suleqatigalugit pissasoq. Immikkut kattuffinni aaqqissugaanngitsunik timersoqatigiiffeqarmat timersoqatigiiffiit aalajangersakkami immikkut taaneqarput.

Imm. 3-mut

Aalajangersakkami aalajangersarneqarpoq timersornikkut piginnaasaqartunik pikkorivissunillu tapersuineq timersornikkut piginnaasaqartoq pikkorivissorlu timersornermik ingerlataqarnermi saniatigut ilinniarnissaminut periarfissaqarnerisa qulakkeerneqarnissaanut immikkut pisussaaffeqartoq. Tamanna aamma Elite Sport Greenlandip malittarisassaani aalajangersarneqarsimavoq.

§ 21-mut

Imm. 1-imut

Aalajangersakkami timersornermi timigissarnermilu nakorsaaitit pissassaaitut atorneqartarnerinut suliniutit siunnerfeqarnerannik, pitsaaninngortinnissaannik ataqatigiissarneqarnissaanillu siunertaqartumik ataatsimiititaliamik attaviitsumik, Nakorsaaitit Pissassaaitut Atorneqartarnerinut Kalaallit Nunaanni Akiuisunik, Naalakkersuisut pilersitsissasut inatsisitigut aalajangerneqarpoq, tassunga ilanngullugit pitsaaliuineq akiuinerlu. Tamatuma tunuliaqutaa tamatumanilu siunertaq pillugu siunnersuummut nassuiaatinut nalinginnaasunut innersuussisoqarpoq.

Ataatsimiititaliap attaviitsuunera isumaqarpoq Naalakkersuisuniit allaniilluunniit arlaannatigulluunniit ilitersuussinissamut pisussaaffeqanngitsoq.

Imm. 2-mut

Aalajangersakkami aalajangersarneqarpoq siunertaminik malinninnerup isumaginissaanut ataatsimiititaliaq sunik suliassaqaarnersoq. Suliassat allattorneqarneri nakorsaaitit pissassaaitut atorneqartarnerinik pitsaaliuilluni akiuilluni ataatsimiititaliap suliqaarneranik aallaaveqarpoq. Nr. 1-3-mi suliassat taaneqartut taamaalillutik pitsaaliuinerlutik annerusumik attuumassuteqarput, nr. 4, 6 aamma 7-imi taaneqartut suliassat tasaanerullutik akiuiniarnermut attuumassuteqartut. Nr. 6 pitsaaliuinerlutik akiuiniarnermullu tunngasuvoq.

Imm. 3-mut

Nakorsaaitit pissassaaitut atorneqartarnerinik akiuiniarnermik nakkutilliisunik iluameersumik piginnaataasunik piukkunnaateqartunillu suleqatigiinneq Nakorsaaitit Pissassaaitut Atorneqartarnerinut Kalaallit Nunaanni Akiuisut pilersitsinissaanik aalajangersagaq pisussaaffiliivoq. Taamaattorli imm. 4-mut nassuiaatit takukkit.

Aalajangersakkami siunertarineqarpoq nakorsaaitit pissassaaitit atorneqartarnerinik nakkutilliinerup piukkunnaateqartumik ingerlannissaa, tassunga ilanngullugit ernumanangitsumik, piareersarluakkamik, ingerlalluarneqartumik aamma nakkutilliinerup kingorna passunneqarluartumik.

Iluameersumik piginnaatitaasunik piukkunnaateqartunillu paasineqassaaq nakkutilliisuni ilaasortat suliassap isumagineqarnissaanut eqqortunik piukkunnaateqassasut, taakkulu suliassap isumaginissaanut Nakorsaaitit Pissassaaitit Atorneqartarnerinut Kalaallit Nunaanni Akiuisunit pisortatigoortumik toqqarneqarsimassallutik.

Imm. 4-mut

Imm. 3-mi taaneqartunut nakorsaaitit pissassaaitit atorneqartarnerinik akiuiniarnermik nakkutilliisunut periarfissatut allatut imaluunniit tapertaasussatut nakorsaaitit pissassaaitit atorneqartarnerinik akiuiniarnermik nakkutilliinerup tamakkiisumik ilaannakuusumilluunniit isumaginissaa pillugu nunanit allaneersunik nakorsaaitit pissassaaitit atorneqartarnerinik akiuiniartunik suleqateqarnissamik Nakorsaaitit Pissassaaitit Atorneqartarnerinut Kalaallit Nunaanni Akiuisut aalajangersagaq aqquutigalugu isumaqatigiissuteqarsinnaavoq. Maannakkut Nakorsaaitit Pissassaaitit Atorneqartarnerinut Kalaallit Nunaanni Akiuisut taamatut Anti Doping Danmarkimi suleqatigiinnissamik isumaqatigiissuteqarpoq.

Taamatut suleqatigiinnissamut isumaqatigiissut allaniit immikkut suliatigut ilisimasalinnik iluaquteqarnissamik kissaateqarsinnaanermut tunngaveqarsinnaavoq.

§ 22-mut

Imm. 1-imut

Aalajangersakkami aalajangersarneqarpoq Nakorsaaitit Pissassaaitit Atorneqartarnerinut Kalaallit Nunaanni Akiuisut qanoq katitigaassanersoq.

Ataatsimiititaliap suliarnik piukkunnaateqartumik piginnaasaqartumillu isumaginninnissanut pisariaqartutut isigineqartunik ataatsimiititaliami ilaasortat ilisimasaqarnissaat pingaartutut isigineqarsimavoq. Taamaattumik ataatsimiititaliap katitigaanissaa siunnersuutigineqarpoq, nalinginnaasumik timigissarneq, timersortut pikkorivissut aamma timersornermi nakorsaasersornermik pissutsinik ilisimasaqartunik sinniisoqarluni. Ataatsimiititaliami ilaasortat taamatut piukkunnartumik ilisimasaqartut toqqarneqarnissaasa qulakkeerlugit suliarnikkut piginnaasaqartut aqquutigalugi oqartussat inassuteqartussat taaneqartut isumaqarfigineqarput.

Ataatsimiititaliaq siunnersuutigineqarpoq tallimanik ilaasortaqaassasoq suliatigut ilisimasaqarnissaaq qulakkeerniarlugu aamma ikinnerusunik ilaasortaqaqartumik ataatsimiititaliamut atasumik sanngiissinnaaneq pinngitsoorniarlugu.

Imm. 2-mut

Aalajangersagaq attuumassuteqarpallaarnikkut ajornartorsiutit pinngitsoortinnissaannik tunngavilersorneqarpoq.

Imm. 3-mut

Aalajangersakkami ataatsimiititaliap piffissaq atuuffissaa peqatigisaanillu ataasiarluni toqqaqqittoqarsinnaasoq aalajangersarneqarpoq. Tamatumunnga pissutaavoq ataatsimiititaliap sulinerani ataqatigiittoqarnissaa eqqarsaatigalugu tulluarsinnaammat ilaasortat ilai piffissami suliffiusussami nutaami ingerlaqqinnissaanut periarfissaqarnera, peqatigisaanillu ataatsimiititaliap suliassaminik isumaginninneranut pingaarluni nutarsaaneq ineriartortitsinerlu ataatsimiititaliami ilaasortat piffissami suliffiusumi marluk sinnerlugit ilaasanninnissaat.

Naggat kingulleq ataatsimiititaliap qaqugukkulluunniit sulisinnaanissaata qulakkeerneqarnissaa siunertaqarpoq.

Imm. 4-mut

Aalajangersakkami aalajangerneqarpoq ataatsimiititaliaq nammineq siulittaasussamik aamma siulittaasup tullissaanik inissitsitissaaq aamma suleriaasissani nammineq aalajangersarlugu. Ataatsimiititaliap attuumassuteqartuunnginneranut atatillugu tamanna isigineqassaaq.

Oqaaseqatigiit kingulliit ataatsimiititaliap tamatigut aalajangiisnaassuseqarnissaata qulakkeerneqarnissaa siunertaraat.

Imm. 5-imut

Ataatsimiititaliaq pillugu allattoqarfikkut sulinerup isumagineqarnissaa siunnersuutigineqarpoq Kalaallit Nunaanni Timersoqatigiit Kattuffianut tunniunneqassasoq. Aamma ullumikkut taamaattoqarpoq. Naliliisoqarpoq Kalaallit Nunaanni Timersoqatigiit Kattuffiat angissutsimigut sulisoqarnermigullu suliassap taassuma isumaginissaanut piareersimasoq.

§ 23-mut

Imm. 1-imut

Timersornerup timigissarnerullu aqqissugaasup avataani timersornermi timigissarnermilu nakorsaaitit pissassaaitit atorneqartarnerisa aamma pitsaaliorneqarneri akiorneqarnerilu sapinngisamik qulakkeerneqarnissaat aalajangersakkami siunertaavoq. Tamanna siunertaralugu timigissartarfinnik ingerlataqarfinnillu allanik timersornikkut imaluunniit timigissarnikkut sammisaqartitsinermik neqerooruteqartut imaluunniit taakkununnga eqqaanartunik sammisaqartitsisunik aamma Kalaallit Nunaanni Timersoqatigiit Kattuffiannut ilaanningsunik aamma Kalaallit Nunaanni Timersoqatigiit Kattuffianut ilaasunik immikkut kattuffinnik, timersoqatigiiffinnik, timersornermi klubbini aamma timigissartarfiit avataanni timersornermi timigissarnermilu ingerlataqartut kattuffinnik nakorsaaitit pissassaaitit atorneqartarnerisa aamma pitsaaliorneqarneri akiorneqarnerilu pillugit Nakorsaaitit Pissassaaitit Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarnissaa pisussaaffilerneqarpoq.

Imm. 2-mut

Aalajangersakkami aalajangersarneqarpoq suleqatigiinnissamut isumaqatigiissutit sunik qulakkeerissanersut, tassa timigissartarfiit il.il. ilaasut Kalaallit Nunaanni Timersoqatigiit Kattuffianut ilaasut immikkut kattuffinnut, timersoqatigiiffinnut, timersornermi klubbinut aamma timigissartarfinnut atuuttut maleruagassat naapertorlugit nakorsaatit pissassaatit atorneqartarnerinik nakkutilliinerit aamma nakorsaatit pissassaatit atorneqarnerini pineqaatissiinerit naammassineqartarlutik.

Taamaalilluni aaqqissuussineq siunniunneqarpoq taanna malillugu timersornerit timigissarnerillu kattuffinni aaqqissugaanngitsut aamma nakorsaatit pissassaatit atorneqartarnerinik akiuinermi maleruagassanik malinninnissaat eqqortitsinissaallu qulakkeerlugu taakkuninnga suleqatigiinnissamik isumaqatigiissuteqartoqarluni.

Imm. 3-mut

Suleqatigiinnissamut isumaqatigiissutit naapertorlugit sullissinerit pillugit isumaqatigiissuteqarfigisamut akileeqquisoqartarnissaanut aalajangersagaq tunngavissiivoq. Tamanna assersuutigalugu nakorsaatit pissassaatit atorneqartarnerinik nakkutilliinerup ingerlanneqarneranut akiliutaasinnaavoq.

Imm. 4-mut

Tunngavissiinermi aalajangersagaq assersuutigalugu aalajangersimasunik isumaqatigiissutaasartut atorneqarnerisigut imaluunniit immersukkat aalajangersimasut atorneqartarnissaat pillugu suleqatigiinnissamut isumaqatigiissuteqarneq pillugu maleruagassat aalajangersarneqarsimasut atorneqarsinnaassapput.

§ 24-mut

Imm. 1-imut

Aalajangersakkami Nakorsaatit Pissassaatit Atorneqartarnerinut Kalaallit Nunaanni Akiuisunik suleqatigiinnissamik isumaqatigiissusiortoqarsimanersoq pillugu paasissutissiinissamut pisussaaffimmik aalajangersaasoqarpoq. Tamatumunnga tunngavilersuutaavoq neqeroorutaasinnaasumik atuisuusinnaasut taamaalillutik ilisimassammassuk neqeroorummik neqerooruteqartup nakorsaatit pissassaatit atorneqartarnerinik akiuiniarnermi maleruagassanik malinninnersoq. Peqatigisaanik timigissarfimmut il.il. pineqartumut tapiissuteqarsinnaanermut pisortani oqartussat periarfissaqarnerannut tamanna pingaaruteqassaaq.

Imm. 2-mut

Aalajangersakkami aalajangersarneqarpoq qanoq paasissutissiisoqassanersoq, tassa timigissartarfiup imaluunniit suliffeqarfiup isaariaani allagarsiinikkut taamaalilluni taanna sullinneqartunut takuneqarsinnaalluni. Taamaalilluni tamatumani nalunaaqutsiinissamut

aaqqissuussisoqarpoq, taamaalilluni sullinneqartut timigissartarfik il.il. suleqatigiinnissamut isumaqatigiissuteqarnersoq pillugu paasinartumik erseqqissumillu paasitinneqarluni.

Aalajangersakkami oqaaseqatigiit kingulliit tassani oqaaseqatigiinnik siullernik tunngavilersorneqarput.

Imm. 3-mut

Paasissutissat ilusilersorneqarnerannut erseqqinnerusumik piumasagaatinik Nakorsaaitit Pissassaaitit Atorneqartarnerinut Kalaallit Nunaanni Akiuisut aalajangersaasinnaaneranut aalajangersagaq periarfissiivoq. Tamanna pisinnaavoq isumaqatigiissutini nalinginnaasumik piumasagaaitit imaluunniit timigissartarfimmu, suliffeqarfimmu il. il. atuuttunik immikkut pissutsinut atasunik piumasagaaitit pisinnaavoq.

§ 25-mut

Imm. 1-imut

Inuit nakorsaatinik pissassaaitit atorneqartartunik atuisimasut pineqaatissinneqarsimasut pillugit paasissutissanik imaqartumik elektronikkikkut nalunaarsuiffimmik Nakorsaaitit Pissassaaitit Atorneqartarnerinut Kalaallit Nunaanni Akiuisut ingerlataqarnissamik aalajangersakkami pisussaaffilerneqarpoq. Tamanna nakorsaaitit pissassaaitit atorneqartarnerinik akiuiniarnermi maleruagassat sunniuteqartumik eqqortinneqarnerinut tunngaviumik taamatut nalunaarsuiffiup ingerlanneqarneranik tunngavilersuutigineqarpoq.

Imm. 2-mut

Nalunaarsuiffimmiit paasissutissat kimut Nakorsaaitit Pissassaaitit Atorneqartarnerinut Kalaallit Nunaanni Akiuisut ingerlateqqinneqarsinnaaneramik aalajangersagaq aalajangersaavoq. Tassani aamma paasissutissat suut ingerlateqqinneqarsinnaanersut aalajangersarneqarpoq. Peqataasut paasissutissanik ingerlateqqiffiusinnaasut tassaapput nakorsaaitit pissassaaitit atorneqartarnerinik akiuiniarnermi maleruagassanik kinguneqarluartumik eqqortitsinissaannut paasissutissanik taakkuninnga tigusaqarnissamik pisariaqartitsisut.

Imm. 3-mut

Aalajangersakkami aalajangersarneqarpoq peqataasut, nalunaarsukkat aqutigalugit paasissutissanut isersinnaasut paasissutissat pineqartut eqqarsaatigalugit nipangiussisussaaitaasut. Tamatuma kingunerisaanik paasissutissanut allanut ingerlateqqinneqaqqusaanngillat.

Imm. 4-mut

Nalunaarsuiffimmik ingerlatsineq, tassungalu nalunaaruteqartarneq pillugu aamma taassuma aserfallatsaaliorneqarnissaa pillugu maleruagassanik erseqqinnerusunik Naalakkersuisut aalajangersaanissamut aalajangersagaq tunngavissiivoq. Tamanna ilaatigut inuit kikkut nalunaarsuiffiup ingerlanneqarneranut akisussaanerannik tassungalu atasumik

isumannaatsuunissaanut aamma nalunaarsuiffimmut paasissutissanik nalunaaruteqarnermut attuumassuteqartunik isumannaallisaanermi malittarisassat pillugit maleruagassanik imaqaarsinnaavoq. Maleruagassanik aalajangersaaneq nalunaarsuisarnermik inatsimmi sukkulluunniit atuuttumi aalajangersarneqarsimasut iluanni pissaaq.

§ 26-mut

Imm. 1-imut

Nakorsaaitit pissassaaitit atorneqartarnerinik akiuiniarnermi maleruagassanik unioqquitsinermut tunngasunik Nakorsaaitit Pissassaaitit Atorneqartarnerinut Kalaallit Nunaanni Akiuisut aalajangiinerinut naammagittaalliuutinik suliarinnittussamik naammagittaalliorfimmik, ”Kalaallit Nunaanni Nakorsaaitit Pissassaaitit Atorneqartarnerinut Akiuiniarnermut Ataatsimiititaliamik” Naalakkersuisut pilersitsinissaannut aalajangersagaq pisussaaffiliivoq.

Maannakkut Kalaallit Nunaanni Nakorsaaitit Pissassaaitit Atorneqartarnerinut Akiuiniarnermut Ataatsimiititaliami taamatut naammagittaalliorfeqarpoq. Tamatuma inatsisitigut aalajangersarneqarneratigut innuttaasut inatsisitigut isumannaatsuunerat nukittorsarniarneqarpoq, tassa ataatsimiititaliaq naammagittaalliortarfittut ingerlanissaminut maannakkut piumasarineqartumik inatsisitigullu pituttugaasumik uppersarneqarmat.

Imm. 2-mut

Ataatsimiititaliap katitigaanera aalajangersakkami aalajangersarneqarpoq.

Ataatsimiititaliap suliaminik piukkunnaateqartumik piginnaasaqartumillu isumaginninnissanut pisariaqartutut isigineqartunik ataatsimiititaliami ilaasortat ilisimasaqarnissaat pingaartutut isigineqarsimavoq. Taamaattumik ataatsimiititaliaq imatut katitigaassasoq siunnersuutigineqarpoq inatsisilerinikkut paasisimasaqarneq inatsisilerituutut soraarummeersimasumit, eqqartuussanik nakorsaasersuinerimut tunngasunik ilisimasat aamma timersorneq pillugu ilisimasat sinniisuuffigineqarlutik. Ataatsimiititaliami ilaasortat taamatut piukkunnartumik ilisimasaqartut toqqarneqarnissaasa qulakkeerlugit suliamikkut piginnaasaqartut aqutugalugit oqartussat inassuteqartussat taaneqartut isumaqarfigineqarput. Ataatsimiititaliaq siunnersuutigineqarpoq pingasunik ilaasortaqaassasoq. Tamanna naammattutut isigineqarpoq ataatsimiititaliami ilaasortat piginnaasaat aamma suliat naammagittaalliuutit annikitsuinnaat suliarineqartarnissaat naatsorsuutigineqarmat.

Imm. 3-mut

Aalajangersagaq attuumassuteqarpallaarnikkut ajornartorsiutit pinngitsoortinnissaannik tunngavilersorneqarpoq.

Imm. 4-mut

Aalajangersakkami ataatsimiititaliap piffissaq atuuffissaa peqatigisaanillu ataasiarluni toqqaqqittoqaarsinnaasoq aalajangersarneqarpoq. Tamatumunnga pissutaavoq ataatsimiititaliap sulinerani ataqatigiittoqarnissaa eqqarsaatigalugu tulluarsinnaammat ilaasortat ilai piffissami suliffiusussami nutaami ingerlaqqinnissaanut periarfissaqarnera,

peqatigisaanillu ataatsimiititaliap suliassaminik isumaginninneranut pingaarluni nutarsaaneq ineriartortitsinerlu ataatsimiititaliami ilaasortat piffissami suliffiusumi marluk sinnerlugit ilaasanninnissaat. Naggat kingulleq ataatsimiititaliap qaqugukkulluunniit sulisinnaanissaata qulakkeerneqarnissaanik siunertaqarpoq.

Imm. 5-imut

Aalajangersakkami patsisilersuutigineqarpoq ilaasortaq Nunatta Eqqartuussisuuneranit toqqarneqartussa q inatsisilerituutut soraarummeersimanermigut inatsisinik suliaqarnissamut piginnaasaqartuussasoq inatsisinillu suliaqarsinnaanissamik piginnaasaqarnissaq pingaartinneqartorujussuusoq maalaarutininik suliaqartarnissaq eqqarsaatigalugu tamakku inatsisinik aalaveqangaatsiartarnissaat naatsorsuutigineqarmat.

Imm. 6-imut

Aalajangersakkami aalajangerneqarpoq ataatsimiititaliaq nammineq suleriaasissaminik aalajangersaassasoq. Ataatsimiititaliap attuumassuteqartuunnginneranut atatillugu tamanna isigineqassaaq.

Oqaaseqatigiit kingulliit ataatsimiititaliap tamatigut aalajangiisinnaassuseqarnissaata qulakkeerneqarnissaa siunertaraat.

Imm. 7-imut

Ataatsimiititaliaq pillugu allattoqarnikkut suliassamik isumaginnittussa q aalajangersakkami siunnersuutigineqarpoq tassaassasut Naalakkersuisut. Tamatumunnga tunngavilersuutigineqarpoq allattoqarnermik suliassap Nakorsaatit Pissasaatitut Atorneqartarnerinut Kalaallit Nunaanni Akiuisut sinnerlugit allattoqarfimmit isumaginnittumit Kalaallit Nunaanni Timersoqatigiit Kattuffianit allaanerusumi allattoqarfiup inissisimanissaa tulluurtut isigineqarpoq. Taamaattoqassappat attuumassuteqarpallaarnikkut tamanna ajornartorsiortitsissammat.

§ 27-mut

Imm. 1-imut

Aalajangersagaq kulturikkut ingerlatsineq sunngiffimmilu sammisassa qartitsineq pillugit peqqussummi § 37, imm. 1-imik ingerlatseqqinneruvoq timersornermut timigissarnermullu aningaasartuutit tamarmik kommunimit akilerneqassapput, aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat. Namminersorlutik Oqartussat aamma kommunit inatsisitigut pisussaaffiusup suliassat akilerneqarlutik isumagineqarnissaat pillugu isumaqatigiissuteqarsinnaassapput.

Namminersorlutik Oqartussat aamma kommunip ataatsip arlallilluunniit akornanni suliassanik tunniussinermi erseqqissarneqassaaq suliassat suut tunniunneqarnersut.

Imm. 2-mut

Aalajangersagaq kulturikkut ingerlatsineq sunngiffimmilu sammisassaqtitsineq pillugit peqqussummi § 37, imm. 2-mik ingerlatseqqinneruvoq tassani aalajangersarneqarluni kommunit agguarnerisa avataanni imm. 1 naapertorlugu aningaasartuutit Naalakkersuisunit isumagineqartassasut.

§ 28-mut

Imm. 1-imut

Aalajangersakkatigut Kalaallit Nunaanni Timersoqatigiit Kattuffiat, Elite Sport Greenland aamma Nakorsaaitit Pissassaaitut Atorneqartarnerinut Kalaallit Nunaanni Akiuisut peqquneqarput tamatumunnga piffissaliussatut Naalakkersuisut aalajangersagaat nallertinnagu ukiumut qaangiuttumut naatsorsuusiortiusumut naatsorsuutiminnik kukkunersiorneqarsimasunik allatigullu naatsorsuutinut atortunik Naalakkersuisunut nassiussissasut aalajangersaakkami pisussaaffilerneqarput. Tamanna periutsimik maleruagassanik allanneqarsimanngitsunik inatsisitigut allanneqarluni.

Imm. 2-mut

Aalajangersagaq tunngavilersorneqarpoq Kalaallit Nunaanni Timersoqatigiit Kattuffiannut Naalakkersuisuniit tapiissutit ilai immikkut kattuffinnut aamma timersoqatigiiffinnut kattuffiup ataaniittunut ingerlateqqillugit agguarneqartussaeneri. Taamaalilluni tamanna qanoq annertutigisumik aamma aningaasat qanoq atorneqarsimanerinek takusaqarnissaq pisariaqarluni.

Imm. 3-mut

Aalajangersakkami siunnerfigineqarpoq naatsorsuutininik saqqummiussinerup Namminersorlutik Oqartussani naatsorsuuseriffiup maleruagassai qaqugukkulluunniit atuuttut malinneqarnissaasa qulakkeerneqarnissaa.

Kukkunersiuismik avataaneersumik naalagaaffimmit akuerisaasumit nalunaarsorneqarsimasumillu atuinissamik piumasaqaat tapiissutit annertoorujussuuneri eqqarsaatigalugit piumasaqaataavoq.

§ 29-mut

Aalajangersagaq Kalaallit Nunaanni Timersoqatigiit Kattuffianit aamma Elite Sport Greenlandimit allaanerusunut tapiissutisisartunut allanut naleqqiullugu piumasaqaatinik sukanganninnerusunik aalajangersaanissamut takussutissaavoq. Tamatumunnga

tunnjavilersuutaavoq tassani amerlanertigut pineqartarmata aningaasat tapiissutigineqartut annikinneersuit pineqartarnerat.

§ 30-mut

Aalajangersakkami siunertarineqarpoq tapiissutisisimasoq eqqunngitsunik paasissutissiisimappat, tapiissutisinissamut piumasaqaatit naammassineqanngippata imaluunniit tapiissutit aningaasaliissutigineqartussanut siunertanut allanut atorneqarsimappata tapiissutit aningaasaliissutigineqarsimasut tamakkiisumik ilaannakuusumilluunniit utertillugit akilerneqarnissaat piumasarineqarsinnaanerisa qulakkeerneqarnissaa.

§ 31-mut

Tunnjavissiilluni aalajangersagaq ilaatigut tapiissutit atorneqarneri qanoq uppersarneqarnissaat pissanersoq pillugu maleruagassanik aalajangersaanermut atorneqassasoq eqqarsaatigineqarpoq, tassunga ilanngullugu immersugassat aalajangersimasut atorneqarnissaat pillugu.

§ 32-mut

Imm. 1-imut

Aalajangersagaq kultureqarnermut sunngiffimmilu sammisassaqaartitsinermut peqqussummi § 40-mik ingerlatitseqqinneruvoq. 1. imm. tassani aalajangersarneqarluni inatsisit una naapertorlugu Naalackersuisut aamma kommunalbestyrelsip aalajangiineri allaffissornikkut oqartussanut allanut suliassanngortinneqarsinnaanngitsut.

Ilanngullugu aalajangersarneqarpoq, Naalackersuisut aalajangigaat allaffissornikkut oqartussanut allanut naammagittaalliutigineqarsinnaanngitsut.

Imm. 2-mut

Aalajangersagaq kultureqarnermut sunngiffimmilu sammisassaqaartitsinermut peqqussummi § 40 imm. 2-mik ingerlatitseqqinneruvoq tassani aalajangersarneqarluni suliassat Naalackersuisunik isumaqatigiissuteqarnikkut kommunalbestyrelsimut suliassanngortinneqarsimasut aalajangiinerup nalunaarutigineqarneraniit sapaatit akunneri sisamat qaangiutsinnagit Naalackersuisunut suliassanngortinneqarsinnaasut.

§ 33-mut

Imm. 1-imut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 39, imm. 1 ingerlatitseqqinneruvoq tassani aalajangersarneqarluni inatsisip iluani misileraalluni ingerlataqarnermik siuarsaanissamut tamanna pisariaqartutut

isigineqarsinnaappat utaqqiisaasumik aaqqissuussinertut immikkut pisoqartillugu Naalakkersuisut inatsimmi aalajangersakkanik saneqqussisinnaapput.

Misileraalluni ingerlatsinerup paasinissaanut nalinginnaasumik nassuiaatit innersuussutigineqarput.

Imm. 2-mut

Aalajangersagaq kultureqarnermut sunngiffimmilu sammisassaqartitsinermut peqqussummi § 39, imm. 2-mik ingerlatitseqqinneruvoq tassani aalajangersarneqarluni Naalakkersuisut misileraalluni ingerlatsinissamut imm. 1 naapertorlugu tapiissuteqarsinnaasut.

§ 34-mut

Imm. 1-imut

Aalajangersagaq nutaajuvoq kisianni periutsimik maleruagassanik allanneqarsimanngitsunik inatsisitigut allanneqarluni. Aalajangersakkami inatsisip eqqortinneranik Naalakkersuisut pingaarnertigut nakkutilliisuunerannik aalajangersaavoq.

Imm. 2-mut

Aalajangersagaq annikitsumik allannguuteqarluni kulturikkut ingerlatsineq sunngiffimmilu sammisassaqartitsineq pillugit peqqussummi § 36-mik ingerlatitseqqinneruvoq. Aalajangersakkami aalajangersarneqarpoq inatsit malillugu suliasamisut isigineqarsinnaasutut pisariaqartunik paasissutissanik kommunalbestyrelsimut Naalakkersuisut piumasaqarsinnaapput. Inatsimmi aalajangerakkatigut pisussaatinneqartut oqartussat, kattuffiit il. il. kiisalu Naalakkersuisut tapiissutaannik tapiissutisisartut paasissutissanik piumaffigineqarsinnaapput.

§ 35-mut

Imm. 1-imut

Aalajangersakkani taaneqartuni aalajangersakkamik unioqutitsisunut akiliisitsisoqarsinnaaneranut periarfissamik aalajangersagaq tunngavissiiuvoq. Tassani pineqarpoq § 6, imm. 1-imi qaffasinnerusuni timersorluni unamminerni akiliilluni peqquserlunnernut inerteqqussut, § 24, imm. 1-imi suleqatigiinnissamut isumaqatigiissuteqartoqarsimanersoq pillugu paasissutissiinissamut pisussaaffik aamma § 24, imm. 2-mi allagarsiinissamut pisussaaffik aamma § 25, imm. 3-mi nakorsaatinik pissassaatitut atuisimaneq pillugu pineqaatissinneqarsimasut pillugit allattuiffimmiit paasissutissanut tunngatillugu nipangiussisussaataaneq. Maleruagassat taakku malinneqarnissaat pingaartutut isigineqarpoq taakku pineqaatissiisutaasinnaagamik.

Imm. 2-mut

Akiliilluni peqquserlunneq immikkut ingasattumik pissuseqarsimappat akiliinermik sukanganerumik pineqaatissiisoqarnissaanut aalajangersakkami periarfissiisoqarpoq. Pingaartutut isigineqarpoq akiliilluni peqquserlunnissamut inerteqqussummik ingasattumik unioqquitsinerit sukanganerumik pineqaatissinneqartarnissaat.

Imm. 3-mut

Akiliisitsinikkut inatsisitigut pisinnaatitaasut piginnaatitaasullu aamma pineqaatissinneqarnissaanut aalajangersakkamik periarfissamik tunngavissiisoqarpoq.

Imm. 4-mut

Akiliisitsinermik pineqaatissiiffiusinnaasumik aalajangersakkanik imaqartunik nalunaarutunik atulersitsinissamut aalajangersagaq tunngavissiivoq.

Imm. 5-imut.

Akiliisitaanermi isertitat Nunatta Karsianut tutsinneqassasut aalajangersakkakut aalajangersarneqarpoq.

§ 36-mut

Imm. 1-imut

Inatsisip piffissaq atuutilerfissaa inatsisip atuutilernissaanut piffissap pisariaqartup qulakkeerneqarnissaa siunertaralugu aalajangerneqarpoq, tassunga ilanngullugu pisariaqartunik allaffissornikkut najoqquassaliorneq, ilitsersuusiorneq, il. il.

Imm. 2-mut

Aalajangersakkami aalajangersarneqarpoq inatsisartut inatsisaata atulersinneqarnerata peqatigisaanik timersorneq timigissarnerlu eqqarsaatigalugu kulturikkut ingerlatsineq sunngiffimmilu sammisassaqartitsineq pillugit peqqussut nr. 10, 21. maj 2002-meersumi maleruagassat atorunnaartut. Oqaasertaliussami “timersorneq timigissarnerlu eqqarsaatigalugit” siunnerfigineqarpoq peqqussummi maleruagassat, timersornermut timigissarnermullu tunngasuunngitsut, kulturikkut sunngiffimmilu sammisassaqartitsinermut tunngasut eqqarsaatigalugit atuutiinnassasut.

Imm. 3-mut

Aalajangersakkami aalajangersarneqarpoq peqqussut naapertorlugu maleruagassat aalajangersarneqarsimasut imaluunniit ingerlatiinnarneqartut atuutiinnassapput, taakku atorunnaarsinneqarnissaasa imaluunniit inatsisartut inatsisaat manna imaluunniit inatsisit allat naapertorlugit maleruagassanik aalajangersarneqartunik taarserneqarnissaasa tungaannut. Inatsisip akuerineqarneranut atatillugu naatsorsuutigineqarpoq nalunaarutunik atuuttunik nalinginnaasumik nutarterisoqassasoq.